



樊榭山房全集

冊一

PL
2718
.J14
v.1





2118
J148
v.1

樊榭山房全集

四倍謝更

YORK UNIVERSITY

MAY 15 2001

四部備要

集部

上海中華書局據汪氏刻

本校刊

桐鄉 陸費達 總勘

杭縣 高時顯 輯校

杭縣 丁輔之 監造

四庫全書提要

樊榭山房集二十卷

國朝厲鶚撰鶚有遼史拾遺已著錄是集因所居取唐皮日休句題曰樊榭山房是以爲名生平博洽羣書尤熟于宋事嘗撰宋詩紀事一百卷南宋院畫錄八卷東城雜記二卷又與同社作南宋雜事詩七卷皆考證詳明足以傳後其詩則吐屬嫺雅有修潔自喜之致絕不染南宋江湖末派雖才力富健尙未能與朱彝尊等抗行而恬吟密咏綽有餘思視

國初西泠十子則脩然遠矣前集詩分甲乙丙丁戊己庚辛八卷附以詞分甲乙二卷爲康熙甲午至乾隆己未之作續集亦詩八卷而以北樂府一

卷小令一卷附焉則己未至辛未作也

提要

昔唐楊綰爲文恥於自白非知己不可得而見而
魏丁敬禮嘗求人定其文夫恥於自白者自珍其
文者也求定其文者自疑其文者也僕少好篇詠
晚頗知難三十年以來所作隨手棄斥存篋中者
僅十之二三暇日編次古今體詩爲八卷長短句
二卷譬之山謠村笛雖無當於鍾呂之響而向來
所閱閑居羈旅怡愉憂悴歷歷在目每一開視聊
以省憶生平竊亦自珍自疑願與審音者共定之
外有雜文若干卷叢綴若干卷將次第排纘焉得
毋蹈詵癡符之誚邪乾隆四年三月朔錢唐厲鶚
自序

序

國史文苑傳

厲鶚浙江錢唐人康熙五十九年舉人少貧性孤
峭不苟合始學爲詩卽有佳句於書無所不窺所
得皆用之於詩故時多異聞軼事內閣學士李紱
典浙江試闈中得鶚卷閱其謝表曰此必詩人也
亟錄之計偕至京尤以詩見賞於侍郎湯右曾試
禮部報罷右曾欲止而授之館比遣迎之則已襍
被出都矣十餘年閒再上公車乾隆元年浙江總
督程元薦章應博學鴻詞科試日誤寫論在詩前
又報罷而年老矣值部銓期近復入京行次天津
舊友查爲仁留之水西莊觴詠數月不就選而歸
卒年六十有一鶚摻奇嗜博館於揚州馬曰瑄小
玲瓏山館數年肆意探討所見宋人集最多而又

求之詩話說部山經地志爲宋詩紀事一百卷南宋院畫錄八卷又著遼史拾遺東城雜記湖船錄諸書皆博洽詳贍先世本慈谿徙居錢塘故仍以四明山樊榭名其居所著樊榭山房集二十卷幽新雋妙刻琢研鍊尤工五言取法陶謝及王孟韋柳而別有自得之趣兼長詩餘擅南宋諸家之勝

傳

杭州府志文苑傳

厲鶚字太鴻號樊榭錢塘人康熙庚子舉人少孤貧僦居杭城東園敝屋數椽讀書不輟聲雋一時乾隆丙辰應博學鴻詞科

廷試被放南歸奉老親與鄉閭諸老酬倡閒客遊揚州有馬氏藏書最富延至其家遺文祕牒無所不窺故其發爲詩文削膚存液辭必己出以清和爲聲響以恬淡爲神味考據故實之作搜瑕抉隱仍寓正論于敘事中讀者咸斂手懾服數十年大江南北所至多爭設壇坫皆奉爲盟主焉尤工長短句入南宋諸家之勝

傳

墓碣銘

鄧全祖望撰

余自束髮出交天下之士凡所謂工於語言者蓋未嘗不識之而有韻之文莫如樊榭樊榭少孤家貧其兄賣淡巴菰葉爲業以養之將寄之僧寮樊榭不可讀書數年卽學爲詩有佳句是後遂於書無所不窺所得皆用之於詩故其詩多有異聞軼事爲人所不及知而最長於游山之什冥搜象物流連光景清妙軼羣又深於言情故其擅長尤在詞深入南宋諸家之勝然其人孤瘦枯寒於世事絕不諳又卞急不能隨人曲折率意而行畢生以覓句爲自得其爲諸生也李穆堂閣學主試事闡中見其謝表而異之曰是必詩人也因錄之計車北上湯侍郎西崖大賞其詩會報罷侍郎遣人致

意欲授館焉樊榭襆被潛出京翌日侍郎迎之已去矣自是不復入長安及以詞科薦同人強之始出穆堂閣學欲爲道地又報罷而樊榭亦且老矣乃忽有宦情會選部之期近遂赴之同人皆謂君非有簿書之才何孟浪思一擲樊榭曰吾思以薄祿養母也然樊榭竟至津門興盡而返予諧之曰是不上竿之魚也嗚呼以樊榭爲吏固非所宜而以其清才使其行吟於荒江寂寞之閒以死則不可謂非天矣予交樊榭三十年祁門馬嶰谷兄弟延樊榭于館予每數年必過之嶰谷詩社以樊榭爲職志連牀刻燭未嘗不相唱和已而錢塘踵爲詩社予亦豫焉數年以來二社之人死亡相繼樊榭每與予太息今年予有粵遊槐塘以書告樊榭

之病不意其遽不起也嗚呼風雅道散方賴樊榭
以主持之今而後江淮之吟事衰矣樊榭姓厲氏
諱鶚字太鴻本吾鄉之慈谿縣人今爲錢唐縣人
康熙庚子舉人生於某年月日卒於某年月日享
年六十有一曾祖某祖某父某娶某氏無子以弟
之子爲之後葬於湖上之某峯所著有宋詩紀事
一百卷樊榭山房集二十卷已行於世又有遼史
拾遺十卷樊榭以求子故累買妾而卒不育最後
得一妾頗昵之乃不安其室而去遂以怏怏失志
死是則詞人不聞道之過也且王適不難謾婦翁
以博一妻而樊榭至不能安其妾則其才之短又
可歎也嗚呼樊榭屬予序其宋詩遼史二種忽忽
十年息壤在彼而今隕涕而表其墓悲夫是爲銘

其詞曰

沖恬如白傳兮尚有不能忘情之吟人情所不能
割兮賢哲固亦難禁祇應尋碧湖之故槩兮與握
手以援琴樊榭茗上之故姬也按茗上故姬指
月月初三日戌時沒先徵君逝世十年最
隆壬戌正月納揚州劉姬也見趙意林丁龍泓兩
後去妾是所納

先生
詩註

墓碣銘

栗主移奉交蘆庵記

仁和胡敬謨

古賢者沒而祭社設有監祠以奉粢盛以司宗祏
魂魄戀此枌榆儼然矧夫笠澤游多輞川圖在碧
雲青嶂遺壠非遙白露蒼葭伊人所契者乎徵君
樊榭有子承祀無孫紹宗嫠婦靡依小姑相迓棲
神何所載主而行偕令威以來歸效浮屠而寄宿
分索郎之釀味叨清閼之桐陰憑是壻鄉比乎友
殯而乃窗窺朱鳥刻認丁蘭捏佛奇生通靈化去
豈真委莽未免傳譌於是名流譜以清詞碩彥廣
其新語爲位置馬塍里畔山谷祠旁薦少寒泉皮
從高閣縈鼠跡蛛絲而幾徧與牛衣龍具以相參
飽嘗牆角之酸風冷照屋梁之明月可慨也已今
春趙雪門刺史與蔡木龕李西齋諸君商以先生

墓在西谿主宜近祔乃擇交蘆庵之塔院諏日遷
奉焉中爲先生其右則先生側室朱氏也同龕彌
勒成換骨之神仙相伴維摩有散花之天女閱春
秋而兩祀蔽風雨於三楹想曩時選石開尊叩舷
度曲一筇拄雪雙屐拖雲路宋輦以苔封山秦亭
而翠滴新詩幾許舊夢難尋賸秋水之彎環對林
梅之蕭瑟莫不流連光景彷彿生平從茲勿務增
華以期垂遠守斗酒隻雞之約勝事可常共拚裳
聯襪而來扁舟徑渡相與整齊肴蔕拂拭壺觴蘆
中人蘆中人庶其靈爽式憑苾芬來享也夫

栗主記

墓田碑記

錢唐吳錫麒撰

在昔修謫仙之祀剔壤青山薦處士之馨割租近縣此皆眷懷往喆崇想芳徽辦香之誠不關孫子私淑之意詎假淵源而沃衍相資茲芬用告蓋所以明後人之公好樹先士之清則焉若吾杭樊榭先生忍貧於身蓄富在學事賅其舊扇南宋之風言飫其清得西湖之味一時推爲祭酒末學仰其津逮始舉孝廉之科旋膺徵辟之

詔似宜仰邀田秩早受圭腴而乃兩屐苔枯一棺蓬掩幾至前和之齧竟無後嗣之延今西谿法華山所謂王家塢者其墓在焉樵歌牧簫之往來馬磨牛醫之雜襲觴聞柏下祭少壻閒則有顧涑園太守過墟墓而生哀遇春秋而展祀曾合同志各

致慕思亡何舊雨不來故人已逝徐穉之雞莫設
劉伶之士常乾是非少劃膏腴俾資牲醴安望馨
香無缺俎豆常繇爰有諸賢更謀義舉遂鳩金於
冢旁置祀田若干畝付交蘆菴僧常源收息以爲
納糧供祭之用裘乃成於衆腋繇亦出自同功由
是霜露示期粢盛有備藉免餒而之憾庶慰逝者
之心雖或淩跨太虛翱翔八極豈復戀松楸之美
計體魄之安然而湘纍渺然椒漿莫輟水仙近在
鞠薦無愆冀神靈之式憑振風雅於勿替秋風十
畝幸不遠於蘆中寒食一盂願無忘乎繇上因貞
諸石以志厥功敢告後來永念勿懈

墓田碑記

軼事

厲先生居東園高大父魚亭公居古驛後相去二里過從最密讀書務根柢之學每著一書輒訂可否手稿皆留余家遼史拾遺東城雜記湖船錄先後雕于振綺堂宋詩紀事南宋雜事詩絕妙好詞箋詩詞集文集俱有刊本惟南宋院畫錄玉臺書史僅見鈔本

四庫全書著錄七種咸豐末板燬兵燹越二十載余檢古文詩詞舊本與范誠民士麒朱英甫士俊讎校重雕其游仙詩三卷秋林琴雅詞四卷少年作也迎鑾新曲二卷與吳甌亭城同撰也並集中未載之若干首都爲集外詩詞乾隆壬申先生沒葬西溪以從子志黼爲嗣又無子

木主遂祔入湖墅黃文節公祠道光戊子世父
小米公集邑人移奉近墓之交蘆菴又三十四
年毀于浩劫同治庚午滿洲冠九如山重加修
葺供奉如昔文人學士每當蘆花盛時隻雞斗
酒以薦先生宿草尙存莫不感慨係之生平軼
事掇拾諸書錄載于左俾後之尙論者有所資
焉光緒十年甲申秋同里後學汪曾唯

杭大宗先生詞科掌錄云厲太鴻爲詩精深華妙
截斷衆流鄉前輩湯少宰西厓先生最所激賞自
新城長水盛行時海內操奇觚者莫不乞靈於兩
家太鴻獨矯之以孤澹用意旣超徵材尤博吾鄉
稱詩於宋元之後未之或過也性耽閒愛靜樂山
水一再計偕遂絕意仕進以薦來都試題誤寫論

在詩前遂罷歸生平詩逾萬首勇於刪擇樂府爲
今海內第一仿計敏夫例爲宋詩紀事百卷摭采
極富是科徵士中吾石友三人皆據天下之最太
鴻之詩稚威之古文紹衣之攷證穿穴求之近代
罕有倫比紹衣丙辰先成進士改庶常例不當試
後以散館出外稚威以疾太鴻以違式皆不得在
詞館豈非命哉

又道古堂文集厲母何孺人壽序云執友樊榭厲
先生自其壯歲卽中乙科兩與計偕不得志卽棄
去不復事旣而部檄其名趨就選人買舟一至津
門留連三月而返說者咸謂其樂迂習嬾才不可
以爲世用以余觀之是謂不知樊榭者也樊榭少
而孤露奉太夫人之教績學以至於有立夫豈不

知圭紱之可以榮親祿入之足以養老而顧杜門
卻軌甘寂寞而就枯槁者誠以仕宦之難惟縣令
爲最其能久居其處者大術有二焉佞顏卑辭骨
節姍媚佞佞覲希寵而取憐一矣憑藉權勢擅
作威福色厲內荏虐熒獨而畏高明又其一矣樊
榭之才千詩百賦鬱怒遒緊長輸遠逝雖極之傾
河倒峽而不見其所止若以其鴻朗高邁之懷骀
駢磊落之志屈而與今之仕宦者相習譬之方枘
圓鑿齟齬而不相入而謂其能呶訾栗斯喔咿
嚅以爲閃掄乎而謂其能逞妖作蠱妄生眉眼以
絞訐而摩上乎度己不能強而試之則所以貽太
夫人之憂者方大此在庸人且知其不可而謂樊
榭之賢與太夫人之通達大體而顧昧昧而不之

思乎且夫人之求仕者將以爲養也樊榭和而不
隨介而有守使其得位而行其志必且飲冰茹檠
其刻苦當較甚於恆時太夫人習於古訓如所謂
卻胡威之絹封陶侃之鮓聞之已熟其所以砥礪
其子者詳慎而周密又可知也然則脂膏之潤與
潔白之養兩者相較孰得孰失豈待智者而後決
哉今年九月朔日爲太夫人八十生辰同人謀所
以爲壽者乞言於余余自羈貫與樊榭交申登堂
之敬常拜太夫人於堂下樊榭巾帨之契計莫有
先於余者則知樊榭之深又孰有過於余者乎用
敢綜樊榭出處之大節與太夫人之所以成之者
以侑一觴焉因以嘆古人捧檄色喜特以庸人待
其親而於道未有聞也樊榭其倜倜乎遠矣

沈文慤別裁集詩話云樊榭徵士學問淹洽尤熟精兩宋典實人無敢難者而詩品清高五言在劉脊虛常建之閒今浙西談藝家專以釘鉅擗擗爲樊榭流派失樊榭之真矣

汪積山先生尊聞錄云太鴻出居道古脩然意遠詩文之外銳意於詞嘗病倚聲家冶蕩者失之靡豪健者失之肆因約情斂體深秀繇邈興至思集輒自比之孫氏一絃柳家雙璫要以自寫胸抱非求悅衆耳也

吳甌亭先生雲蠖齋詩話云厲徵君肆力於詩鏤心役腎句雕字琢吾鄉百年詩人中殆難其匹性雅好遊所至搜剔名勝攬葛攀藤裴回吟賞必興盡而後已集中西溪諸什直抒胸臆可當山經一

卷讀也

王述庵先生蒲褐山房詩話云徵君性情孤峭義不苟合讀書搜奇愛博鉤新摘異尤熟于宋元以來叢書稗說以孝廉需次縣令將入京道經天津查蓮坡先生留之水西莊觴詠數月同撰周密絕妙好詞箋遂不就選而歸揚州馬秋玉兄弟延爲上客嗣後來往竹西者凡數載馬氏小玲瓏山館多藏舊書善本閒以古器名畫因得端居探討所撰宋詩紀事遼史拾遺極爲詳洽其先世家於慈溪故以四明山樊榭爲號所作幽新雋妙刻琢研鍊五言尤勝大抵取法陶謝及王孟韋柳而別有自得之趣瑩然而清窅然而邃擷宋詩之精詣而去其疎蕪時沈文愨公方以漢魏盛唐倡吳下莫

能相掩也予於戊辰歲在長洲趙君飲谷小吳船
遇之辱爲忘年交後徵君過吳必訪余於朱氏蘋
花水閣凡三年而徵君下世矣至其詞直接碧山
玉田予已錄入琴畫樓詩鈔故不具論 樊榭下

世葬杭州西溪王家塢因無子嗣不久化爲榛莽
後四十餘年何君春渚琪游西溪田舍見草堆中
樊榭及姬人月上栗主在焉取歸偕同人送武林
門外牙灣黃山谷祠埽灑一室以供之予爲撰丈
室花同天女散摩圍詩共老人參句以題其楹月
上姓朱氏名滿孃烏程人

陶篁村先生鳧亭詩話云樊榭寶石山云林氣暖
時濛似雨湖光空處淡如僧此真善於領略西湖
也其他如遊智果寺云竹陰入寺綠無暑荷葉繞

門香勝花元日對雪云無人可造真閑日有雪相
娛此老翁山莊卽事云蔬圃鳥鳴秋境界竹房人
語佛家風南湖秋望云橫塘秋水明菰葉老屋殘
陽上蘇花皆佳句也

王芡檐先生靜便齋集南湖花隱記云倚城北陴
陋舍喧而卽靜水樹明瑟有敞而堂有折而廡有
華散生盤門藩落而延接于櫺檻是爲樊榭山民
南湖花隱宋張鉉功甫所稱管領風月者功甫以
循王諸孫性豪侈務奇意相勝其第宅不一區卽
南湖所占在當日不知幾百畝樊榭以數椽棲託
於後其寂寞爲已甚則樊榭之歎於功甫者也然
樊榭學博而文富所述造泓涵演迤不下數百卷
識者謂其必傳于後無惑功甫稱詩家上將冰如

雪食凋碎月魄雖見推于誠齋楊氏而遺集鮮傳
則又功甫之所遜于樊榭者也君子之游于世有
裁足之思無贏餘之念况出吾之所有不難抗古
人而上之俛仰吟笑綽有餘裕區區居室奚足較
其豐約爲且夫南湖當功甫之盛閨春把菊天鏡
鷗汎月諸勝纍纍無閒壤一時朱黻長纓賓從之
填擁鐘鼉笙絲磬筑之衍宴魚龍爵馬之殫物窮
麗誠無所不足迨其後不數十年淪宇埋音竝就
熏歇今茲所見遠巒雲浮卉木翳蒼禪棲孟瓶之
扣食泠泠水次物不停固與爲豪侈者之役于物
也其終不如寂寞者之適吾素已矣題以花隱樊
榭殆欲佩蘭餐菊以終老于斯夫是爲記

又送杭大宗北行序云吾友厲鶚杭世駿博覽精

覈於學無所不貫所爲文詞高旨深若觀濤重溟
莫得畔岸顧自壯盛僅充秋賦志用不達連屈于
春卿世之人合二君之遇觀其所爲功幾疑學廣
聞多匪所以適用蓋古制不講於茲六十年矣自
聖祖仁皇帝御極之十七年頓絃舉網特闢大科
一時苞純稟精之彥應運鑒至揚輝宣烈照灼夔
古迨後良遇弗再決科發策僅循常選末師後進
靡所傾風二君枕經昨史含英發藻獨知而寡諧
供己而殫力故學古之獲二君獨深疾驅方輪人
之疑二君滋甚茲

天子嗣暉隆緒側席幽潛興繼舊典浙省郡邑博
學鴻詞薦者前後合六十人呈試大憲掇什之二
三二君以瑰麗卓越炳乎十八人之列以十一郡

之廣旌簡所及僅止數人得無少隘然上嚴虛授
下顯良具拔尤升萃乃獲二君四海稱雋等競疇
曩見少之意其亦可以不作矣

朱朗齋先生厲徵君年譜稿云康熙壬申五月初
二日辰時生癸巳爲錢唐王路清賓遠撰疏寮集
序略云近余道駕湖過虎邱臨惠泉往返于荆溪
錫山之閒遇一勝境則必鼓棹而登足之所涉必
寓諸目目之所覩必識諸心自謂此行也詩可盈
篋矣迨歸檢其稿僅得八首而其抑鬱憤懣欲吐
而不得吐者填塞胸臆閒幾不復支靜求其故終
勿可得蓋余擔囊作客所聞者什一之籌所接者
會計之策卽遇佳山水稍滌襟懷而塵壒復垢絕
無文人翰士可角勝于筆墨之場故每一搦管旋

復自棄游雖多而詩則少甲午館汪氏聽雨樓凡
五年浦沅兄弟從游庚子以詩經中式四十九名
舉人辛丑秋游永康房師張梁友署中按集中有
將返武林留別張梁友先生詩云十日琴堂住天
涼抱病歸偶游嗤索米臨別或傳衣是知張梁友
爲房師也雍正辛亥春少司農鳳臺王公鈞爲兩
浙運使時聘修西湖志按纂修職名總裁爲總督
李衛管理爲巡撫程元章總修爲編修傅玉露分
修則與蘇滋恢杭世駿陸秩沈德潛吳焯趙信吳
嗣廣張雲錦陳臻同在局成于甲寅年乙卯正月
會同舉諸公于槐塘宅小眠齋共十一人徵歌選
勝極一時之盛按齊召南賜硯堂詩答汪五槐塘
津門見寄次韻兼懷諸友三首其第二首云吳山

顧曲記當年纔落春燈未禁烟細雨溟濛留客夜
微風料峭養花天清歌共判尊前醉高會誰知夢
裏緣今日浮萍湖海客如君還近五湖船原注云
乙卯正月會同舉諸公于槐塘宅共十一人今則
厲二樊榭沈六幼牧周大青瑤張大介石俱還浙
多時嚴大崧占尙讀禮未出周五石帆得官後卽
以艱歸家每與堇浦星齋晤言不勝今昔聚散之
感乾隆丙辰七月與趙功千偕行入都應徵詞科
題爲五六天地之中合賦山雞舞鏡詩黃鐘爲萬
事根本論報罷南歸辛未三月

皇上南巡偕吳城撰迎

鑾新曲進呈城曲曰羣仙祝壽鶚曲曰百靈效瑞
合爲一編壬申九月十一日辰時歿是年有至揚

州之事按盧見曾漁洋感舊集序是壬申六月撰
序曰辛未冬以公役至京師謁崑圃黃夫子于家
出所抄漁洋先生感舊集見示拜而卒讀之云又
凡例一條曰是集輾轉抄寫譌誤頗多宋編修蒙
泉嘗訂正之復委榆村之孫案余子謙以校讎之
役再三過尚有闕疑玲瓏山館藏書充棟所與稽
者厲樊榭鶚陳授衣章皆博雅君子幸重檢閱而
後授梓毋致有魯魚亥豕之譌云蓋感舊集得于
辛未之冬而開雕于壬申之夏則是先生于辛壬

冬春閒尚留揚州也

按朱朗齋茂才文藻館余家古驛後最久曾編先生年譜

稿雖脫而未成向藏振綺堂曾族祖劍秋茂才鉞
欲增輯成書未竟而卒劫後稿皆散佚今得殘本

錄出數則增入于此以俟後
有考訂重編者再刊年譜

趙意林先生秀硯齋吟橐寄調厲樊榭納姬揚州

云歌吹殘年憶竹西歡情已作絮沾泥泰孃才思
知多少蓼岸桃溪試品題姪人姓劉雪凝柔玉滿邛溝
花蕊新詞乞小留想得定情鴛帳暖莫教月上夜
生愁

曾伯祖滌原公湛蘭書屋雜記云厲太鴻先生著
作等身與先大夫善已成未成諸書稿皆插振綺
堂之架著錄

四庫全書者七種遼史拾遺東城雜記宋詩紀事
南宋院畫錄南宋雜事詩絕妙好詞箋樊榭山房
集

袁子才先生隨園詩話云馬氏玲瓏山館一時名
士如厲太鴻陳授衣汪玉樞閔蓮峯諸人爭爲詩
會分咏一題哀然成集至今未三十年零落殆盡

而商人亦無能知風雅者蓮峯年八十三歲儼然
尙存聞其饑寒垂斃矣 乾隆初杭州詩酒之會
最盛名士杭厲之外則有朱鹿田樟吳甌亭城汪
抱樸臺金江聲志章張鷟洲湄施竹田安周穆門
京每到西湖隄上拈裳聯襪若屏風然有明中讓
山兩詩僧留宿古寺詩成傳抄紙價爲貴四十年
來儒釋兩門一齊絕滅竟無繼起者 余最愛言
情之作如桓子野聞歌輒喚奈何厲太鴻送全謝
山赴揚州云生來僧祔偏多病同往林宗又失期
兩點船燈看漸遠暮江惆悵獨歸時 詩人筆太
豪健往往短于言情好徵典者病亦相同卽如悼
亡詩必纏綽宛轉方稱合作東坡之哭朝雲味同
嚼蠟筆能剛而不能柔故也近時杭堇浦太史悼

亡妾詩遠不如樊榭先生之哭月上也

魏玉璜先生柳洲遺稿碧湖雙槳圖云厲樊榭徵
君姬人朱滿娘以中秋夜同汎碧浪湖而歸因繪
是圖時賢相與爲詩卒後余始獲見之用題其後
夢覺揚州已十年卻從茗水載嬋娟菰城若比松
陵路又覺吹簫白石仙星漢橫斜水拍天碧湖涼
露卸紅蓮中秋月色無窮好卻爲伊人分外圓翠
袖熏鑪伴詠詩春風小閣畫蛾眉誰令誤竊姮娥
藥不見宜男結子時一段春愁化彩虹乍來還去
恨匆匆桃花滿地胭脂溼不待東風嫁小紅

大父十村公重編振綺堂書目云靈隱寺志三冊
是厲樊榭先生手稿黏貼廢書之中書雖未成後
世亦當珍之

按此志編分八卷後有葉者而
吾家書籍毀于粵匪手稿已亡

阮文達擘經室詩錄云蔣蔣邨學博炯請書樊榭
墓碑且與里中諸君子共置祭田報官立案歸西
溪交蘆菴管理詩以紀事劉樊窗榭說明州遺蛻
西溪土一邱多分神仙無子在但憑天地有詩留
他年碑碣碧苔古此日墓田香稻秋記取法華山
下路詞人長與護松楸

黃薌泉先生北隅掌錄云先生東城雜記自序云
杭城東曰東園先君子家焉小子生于是居已三
十餘年凡五遷未嘗離斯地也序作于雍正六年
戊申三月是年四月後有移居詩曰半宅從人典
全家冒雨遷末云差喜東城近則猶在東城也乾
隆己未有予賃居南湖八年矣其主將鬻他氏復
謀棲止詩逆溯之遷居南湖之歲乃雍正十年壬

子是年有南湖初夏詩所謂草堂近卜約齊鄰者也至乾隆庚申始移居麋公古社詩所云麋公祠宇今相竝且逐鄰翁掠社錢者也是先生前後凡七遷皆在東而南湖則近北矣

錢蕙窗先生靜存齋詩集云吾杭厲樊榭徵君沒而無嗣故宅不存主無廟祔塵封比丘尼室者若干年矣春渚丈既備黃文節公之祀見祠有隙宇遂訪其栗主遷於後廡之西并以其姬人月上之主從焉安位之日具蔬果之會青浦王述庵司寇時主萬松講席聞之亦來薦奠自是以後祀文節禮畢牲魚一獻以酹詩魂文節生辰之祀廢已廿稔於茲徵君几筵不知存否嗚呼前賢清風浩氣無所不之一介幽靈湮薶野社良可悲已因紀四

絕用諗來茲南湖何處問比鄰
總帳飄零五十春
歎息舉宗無祔祔一椽野廟與棲神
郡縣崇祠傍學宮
年來升配徧羣公鄉先生可祭于社前
輩猶能舉古風
隨清娛僅賸殘碑適館何緣少婦隨
一縷靈芬飄不斷五湖風月入叢祠
醺酒刳羊事已非
况於廡下一椽依涪翁定反西江社
詞客飄零何處歸

蔡朗餘先生賸稿云厲樊榭徵君制意拙率不修
威儀嘗曳步緩行仰天搖首雖在衢巷時見吟咏
意市人望見遙避之呼爲詩魔
厲徵君之詩詞與金農冬心書畫鄉里齊名人稱髯金瘦厲
厲徵君子繡周有女適桑弢甫先生之孫近仁繡周
亡後其妻丁氏龍泓先生女無所歸奉厲氏先代

栗主依於桑桑家車橋先與其甥倪米樓稻孫同
居而北郭之童佛庵銓又故與米樓善性好奇一
日訪米樓值無人遂於厲氏家廟中檢徵君暨月
上木主懷歸月姬主爲樊榭手書樊榭主爲龍泓
手書童以告何春渚淇詭言得之西溪田舍草堆
中春渚轉告王述庵司寇昶因率同人皮置湖墅
宋黃文節公祠各醵百錢致祭時爲嘉慶六年辛
酉四月六日也

生之外孫吳擷蘅受藻所收贖稿中見之

按先生名焜又號木龕居士易簣之前自焚所著諸稿此三段於先

郭頻伽先生靈芬館詩話云樊榭徵君舊居南湖
自號南湖花隱倪米樓秀才繪花隱樓圖偕李西
齋布衣同作齊天樂詞以紀之戴金谿比部賦南
浦一闋云鷗外夢長閒向湖邊又展露渦風鬢亭

角舊聽鶯楊枝曲消盡粉團香陣涼波無恙畫闌
幾照驚鴻影城上青山如解意點綴玉真眉暈天
涯有客悲秋喚停杯共說老仙花隱隱語笑芙蓉
茶煙杪未歇水樓芳訊斜陽一舸俊游客容易成
孤引霜葉無多明豔別似惜飄零紅粉

近見凌仲子論詞云詞以南宋爲極能繼之者朱
竹垞至厲樊榭則更極其工後來居上北曲填詞
以關漢卿諸人爲至猶詞家之有姜張後之填詞
家如文長粲花笠翁皆非正宗王茗詞壇飛將然
能合元人者惟牡丹亭圓駕一折近人如洪昉思
長生殿乃能直逼元人其氣韻迴與諸人不類其
言累數百余不能盡記且於此道無深解不敢強
爲之說然總覺玉茗之才非餘子可及至謂樊榭

勝竹垞鄙意大不謂然樊榭論詞絕句云偶然燕語人無語心折小長蘆釣師愚謂竹垞小令固佳卽長調紆餘宕往中有澡華豔耀之奇斯爲極至卽小令中佳者亦未必惟此語爲可心折也大抵樊榭之於詞專學姜張竹垞則兼收衆體也 蔣

君夢華以顧升山蔬果畫冊索題上有樊榭河傳十八首後予與二娛皆以菩薩蠻詞題之曹種水亦用河傳調而止用一體樊榭則一首用一調也

樊榭詞集中不存今錄以補亡

按詞僅十五首今列集外詞中

吳榕園先生浙西六家詩鈔云歸愚蘭泉兩先生評樊榭山房詩固已確當獨賞五古而不及七律殆以七律不近唐音耳參用性靈書卷自闢蹊徑諸體皆工七律更耐尋繹如秦淮懷古悼亡姬答

筠谷移居等作皆通體渾成非獨有句可摘而已
其餘美不勝數遙情逸致誦之口角生香近時擅
厥體者初白翁後爲一大宗

李旣沅先生鶴徵後錄云樊榭之詩能於漁洋竹
垞兩家外獨闢畦徑自成一派其幽深精妙窮極
雕鏤譬如入幽崖峭谷幾乎斷絕人迹當時杭堇
浦全謝山輩無不推服錢籜石翁有評本亦爲心
折今海內言詩者標新領異務脫恆蹊多以樊榭
一家爲宗

吳子律先生蓮子居詞話云樊榭生平有煙癖類
韓慕廬嘗譜天香詞傳諸好事同時汪韓門翟晴
江有詩全謝山有賦足備菰材故實方靈臯之官
禮部也曾請飭煙禁以裕民食今則土葉殆徧吾

杭製切尤有名已

吳仲雲先生杭郡詩續輯小傳云厲志黼字之甫
一字繡周號層雲錢塘諸生爲雄飛徵士從子卽
爲徵士後又爲丁鈍丁先生愛壻詩笈文津皆有
所受嘗與蘇展亭許堂柯大巖觀郁陞宣禮倪嘉
樹一擎黃書厓模周亦菴駿發爲文字之會分題
審韻無集無詩惜多散佚所居在城東倉巷破屋
蕭然糲餐自給竟困於縫掖以老

按雄飛亦先生之字也見杭郡

詩輯
小傳

世父小米公借閒生詞云樊榭先生木主舊祔武
林門外黃文節公祠道光戊子正月二十一日同
人移奉西溪交蘆庵先生墓故在此譜白石法曲
獻仙音調並用原韻烟渺南湖草迷東墅欲妥吟

魂何處

先生自南湖移居東城

路逐溪迴寺依雲住騷壇舊

日樽俎

歎大雅淪亡久輕鷗自來去漫相顧薦寒

泉萬梅花裏天女伴隨手散空飛舞

先生姬人朱月上木主亦

祀祀焉

定月下徜徉記前游微笑心許窈窕幽棲悅

披尋集內妙句待荒阡澆酒莫又清明時雨

許蘞生先生重桂堂集云奚虛白疑居湖州城南
舊爲鮑氏溪樓卽樊榭徵君納姬人月上處也虛
白摹遺像屬題次圖中詩韻百年數文獻君名留
人口彼姝適所遭幸于如是柳樂府賽旗亭孰分
袒左右俊遊豔稱前佳話永垂後溪樓亦靈光終
古闢戶牖天公選替人圖書要諸久近釣漁隱漁
親酌酒奚酒

奚家釀酒稱酒奚

青山紅袖閒重置斲輪手

光芒交映輝何處蔽沫斗許我補題詩漫郎成聲

叟

戴文節習苦齋畫絮云余最愛厲樊榭搖搖四詩
人漾入梅花煙十字空澹幽杳得未曾有軟紅十
丈中安得遇此聊假豪楮爲壺公之壺

世父少洪公道盥齋稿云同人泛舟西溪酹酒厲

先生墓詩以紀之已是清明上冢天我來相過弔

詩仙墓門頻酹金樽酒山麓旋飛白紙錢蘋葉南

湖生伴隱梅花西土死償緣九原猶侍高堂側

葬於母何孺人之側不數峯圍七十二賢憶移栗主奉僧堂終

使溫柔老有鄉彌勒同龕燈火寂維摩多病水雲

涼心期共賞蒹葭趣手澤猶留翰墨香

先生主丁龍泓隱君

書月上主

佳偶青溪宜作配重題何日願兼償

先生

配蔣孺人之主不知所在同人以爲
缺典欲補書一主以合祀尚未果

張仲甫先生彝壽軒詩鈔云章次白奉厲徵君神
位於永興寺陪祀馮具區先生酹以詩余亦繼聲
兩賢慧業並生天蕭寺棲神豈偶然遺老倡開招
隱社徵君賡和太平年梅花詩卷俱千古流水高
山共一椽二雪雙龕相映處便娟空翠稱幽眠

詩作於道光甲辰是又設位於永興寺也寺在西溪徵君嘗游憩焉

俞蔭夫學政春在堂隨筆云厲樊榭徵君墓在西
谿法華山之王家隴因奉栗主於交蘆菴事詳吳
穀人祭酒樊榭徵君墓田碑記道光庚寅戴文節
偕徐汪兩君至菴祀徵君歸而寫爲長卷山水縈
紆蘿蔦幽蔚樊榭詩所謂一曲溪流一曲煙者盡
此尺幅中矣舊藏章次白廣文梅竹山房亂後失
去丁君松生又購得之因付交蘆菴僧收藏以存

名蹟時交蘆菴亦因亂後傾圮如冠九觀察出資
修葺并屬何子貞先生書徵君及月上姬人栗主
仍奉菴中今又得文節此卷名流韻事後先輝映
足爲西谿生色矣松生以示余故紀其略焉

諸遲鞠大令璞齋集溪樓延月補圖題記云聖湖
之陰西谿之奧勝地幽剎曰交蘆庵庵有溪樓延
月圖寫厲徵君納姬事雍正乙卯樊榭重客茗溪
鮑氏溪樓實爲寓屋滿孃月上納於中秋碧浪同
舟瑤情玉色未傳圖詠久頗闐焉逮嘉道閒涑園
太守訪楸墓於前小米年丈護栗主於後移祀庵
院永伴瓣香會費山人丹旭安硯東軒曾寫兩圖
一畀庵僧媵藏勿替其副贈奚處士疑溪樓後主
相證墨緣當代名流偕題雅製今具清尊集中庚

辛之難庵燬於賊此圖亦亡邇者舊宇新庀歲已
十六年丈從子子用刺史棄官將歸屬補繪事更
乞偶雲同年重書題製合裝冊子仍付庵僧保守
什襲斯蓋遠縣佳話近繼先志舉一而善備矣子
用復哀刻徵君全集雖其唾餘都經手輯讀書讀
畫煥然粲然吾知海客金餅增價於樂天山門玉
帶比珍於佛印又不第蕭寺之清供抑亦藝苑之
韻談歟故樂爲補圖且拈黃鍾商琵琶仙慢一闋
用白石道人吳興紀述詞韻記之時光緒十有一
年乙酉小暑日也詞曰倒影樓臺有人是打槳來
時桃葉小名惟認團欒黃昏最幽絕消受到吹簫
石帚但春去怕聞鶗鴂畫裏煙波定中香火情事
誰說謾分付禪窟枯僧已風景都非那時節添

了百年佳話儘飛花飛莢憑點綴詞僊眉史補溪
山絹素如雪正好居士清涼倦遊言別

軼事

樊榭山房集卷第一

錢唐厲

鶚

太鴻

詩甲

金壽門見示所藏唐景龍觀鐘銘拓本

以下

甲午

嗜古金夫子貪若籠百貨墨本爛古色不受寒具
浣便續金石錄明誠不是過鐘銘最後得斑駁豈
敢唾照眼三百字字字蟠螭大撫迹思景雲往事
去無那初翦桑條韋柘袍受朝賀范鐘崇玉清搆
炭飛廉佐九乳器未亡雄詞壓寒餓裝比李仙丹
徵句迭倡和虛無奚足稱懋績於此墮吾思景鐘
銘天筆濫傳播

游無門洞

陰竇絕曦景石雨垂癡龍白雲嬾不收繚繞東嶽
松定僧涌壁像海衆驚靈蹤藤花拂又落暝聞烟
際鐘

擬古二首

峨峨崑崙山鬱鬱環剛樹仙人散綠髮正陽無風
雨彈我白雪琴高丘哀無女苟得一心人聊以結
衷素

美人生南國纖手工織紵或爲繞梁歌當窗揚清
音色麗奪華燭情絲閑錦衾戒旦上蘭皋亭午眺
青林采葛知心苦激漂能自沈不爲懷春意誰識
空閨心

花塢二首

法華山西山翠深松篁蒙密自成陰團瓢更在雲

深處惟有樵風引磬音

白練鳥從深竹飛
春泉淨綠上人衣
分明孟尉投金瀨
吟到日斜猶未歸

牧童詞擬張司業

主人授我烏犢牛
爲言主人百不憂
朝逐水草暮歸宿
不使飛蚤傷牛目
牽牛且向南陂嬉
不知牛腹飽與飢
一朝牛病逃鞭笞
主人自能問牛醫

觀汪青渠所藏嵩山諸碑版拓本六首

漢啓母廟石闕銘

開母化爲石其事本荒誕
何年六六峯石闕字漫漶

東魏嵩陽寺碑

運歸賀六渾悲吟後漢書
可憐嵩陽寺巋肩劫灰

餘

秦王賜少林寺主教

逆豎德充符一千思驅羊當時殲除力何以資空王

天后夏日游石淙詩

金輪昔垂衣逍暑平樂澗仙巖類削成幾人侍游
讌

唐裴灌少林寺碑

傳聞三花樹香雨徧諸天何日持苕帚心空初祖
禪

唐尉遲汾嵩山靈勝詩

名嶽鎮中畿靈異紛不一欲從劉根游吾其采芝
尤

秋夜宿葛嶺涵青精舍二首

笑看圓月上前峯塔影微瀾臥玉龍林際窺人太
無夢好風吹送隔湖鐘

書燈佛火影清涼夜上層樓看海光蕉飈暗廊蟲
弔月無人知是半閒堂

晚秋寄楊楊山

半籬梯葉擁堦除又見臯蘭卽漸疎水減舊痕魚
上後霜傳新信雁來初雲山不用遮方麴燈火惟
應照佛書寫寄寂寥君定會宅南難覓柳郎居

讀水經注寄金壽門

霜橘耀西林木葉滯寒雨流觀桑欽書靜檢道元
注峯瀨奔几案恬目非一趣玉笥若境接香爐定
神遇或時談幽怪細儒訶繆誤不知天地大安識

陰陽鑄持問蒼水使祕簡儻可覩弱齡耽覽涉苦
乏濟勝具不如從韓終服食生毛羽君有禽尙心
告我懷所寓

西溪道中

連野看峯秀晴雲忽有無寒田吹穉經清渚亂鷗
鳬意謂前林近誰知細路迂人家炊過午空翠集
山廚

由牛滑嶺至龍門坑

山腰多農家茅茨映山色暝烟歸樵人溪光帶禪
客樹遺鶴毳鮮泉瀉龍漿白愛此欲移居惆悵振
輕策

宿龍門山巢雲上人房

山在錢唐之西
俗名小山和山

山樓出樹杪夜宿萬山中虎嘯不驚定鐘聲疑在

空背窗棲鳥影滅燭聽松風明日尋堦水應添十二筒

冬日雜詩二首

霜酣槲葉一村明茅屋高低烟火生多事牆頭烏
白鳥夜闌相答紡車聲
水邊僧屋剎竿雙飢鳥窺人上石幢解向西風吟
落葉黃金合鑄賈長江

蠟梅

勻掠宮黃鬢朵鮮斜門疎竹暎便娟年年分餉銅
街處正是城南小雪天

月夜自草堂步至永壽寺望東臯餘雪

微月在門前泠然發清興衣棱入風舉屐齒共冰
競遂尋桑竹閒蒼涼得古徑鱗鱗見殘雪遙山瑩

而淨陰地銷還凝老屋凍稍勁卻顧所來路始知
原野夤寒鐘遠更響到寺棲禽定霜闌星芒大天
清樹影正決皆無纖翳觀心極明暎悠然林臯意
卽事寄謠詠

人日游南湖慧雲寺七首

以下乙未

南湖春水綠溫暾老柳生稊竹有孫頭白僧閑能
引路斜陽挂處指三門

鐘魚寥落入新年玉照堂空賸水田今日不成煎
餅會粉圍香陣憶詩仙

張功甫賞心樂事有人日煎餅會粉圍香陣擁詩仙

張梅詞也

禪房鴨脚脫層陰定破關門芋火深至竟繁華歸
夢幻最無人處叫春禽

蓮莖芡葉臥敲斜水外經寮記鬪茶劫火南朝四

百寺一袈裟地屬張家

捨宅裴休事亦勤披緇王旦謗須分淳熙年往碑

陰在細讀龍華發願文

寺碑史浩撰樓鑰書碑陰功甫自作捨宅發願疏最

工首二句卽
櫟括其語

朱崖南去鳥呼風草木平泉笑衛公何似試香城
北墅殘僧禮拜冷烟中

登高何處可忘歸古寺梅風動客衣漸有放生團
社約魚苗如蟻水初肥

過丁茜園齋觀陳洪綬合樂圖

春陰泥殺人如醉不得醒東風勒花房未破小桃
杏竭來過蕭齋款語樂閑靜先生澹蕩姿愛客具
佳茗那用嘲水厄頗足勝醪酤自起展標池射目
驚秀穎一女譚兩鬟輕紅掩斜領摻手摩長笛將

吹絳脣冷一女臉如蓮黛色自脩整襪襦飄回風
輕容曳烟影半扶琵琶肩指撥試俄頃復有兩女
奴鴉鬟遮瘦頸腰身十三四背面若相請或是梁
綠珠生自雙角井弟子得宋褱吹笛入清迴或是
楊阿環合樂最機警鳳紋邏紗槽只有阿蠻省先
生木石腸伐性久已憬翻然持此幅儻足娛老境
列屋閉蛾眉便娟笑齊癭無須五斛螺簾衣兼可
屏

沙河

澄明日影射魚罩淡冶風光上鴉陂齊浸籬根三
尺水小桃正是試花時

寄倪子珍讀書仁王寺

聞君高臥洛生咏遙望吳山病目揩居士舊傳十

笏地幽人新學入關齋野雲帶雨飛入戶林鳥聞
鐘時下堦更憶清吟獨繞寺撚髭不覺落松釵

北郭

北郭夕陽外人家住水西藤花當戶落荷葉並橋
齊沙碧鳥雙下樹涼蟬獨嘶輕絺來往熟幽興坐
堪攜

早秋夜坐懷蔣丈靜山

夜軒殺明燈秋蟲啼四壁人靜月復清雲疎雨猶
滴懷君竹閒徑況此風中笛幽意其如何堦草自
寂歷

絡緯

絡緯亦應候身潛葉底敲刁騷風激響斷續雨兼
悲破屋燈青色柴門夜黑時哀聲感寒女能得幾

絢絲

送梅耦長先生罷泰順令還宛陵

歸去宣州七月初蕭然行李意何如官身已謝潘
懷縣真散應同陶隱居稍待西風看雪稻更聞春
網薦琴魚修船謠似舂陵作此日雲山不負渠

在東甌時作修
船謠恤民役也

題畫松鼠

閑拏五粒戲睠目烟霄外不須歎倉中久已誤上
蔡

汪青渠送研光牋

蕭然注毗曇長物亦何有夜吟蹋壁臥朝吟但袖
手故人造雲藍輒遣五十枚瑩然女兒膚心目爲
之開一笑磨烏丸欲試復惆悵剡藤遭天闕此語

定非妄既無連絲書亦無播拏詞時展白萍文報
君長相思

月夜懷金繪卣游湖南三首

徘徊去燭房延佇啓虛牖白露淒未零衆星惟見
斗清輝在衣裳憶昔同攜手無由折瓊枝紆軫一
搔首

搔首那可期遠在沅湘麋青楓泊船處竹外湘娥
悲聞歌兩東門秋髮飄如絲隱隱女嬃砧千里長
相思

相思共明月復此清商節迢迢蒼梧雲芳草殊未
歇羈人常念歸誰能忘離別驚蜩過樹飛斜漢亦
已沒

九月三日池上

片段殘雲都卷盡水邊秋思渺無涯西風吹過徐
熙鴨丁倒蓮房搖箭戟

湖上擬游龍井不果寄汪大輿

平生湖山鄰幽夢阻龍井辨才跣趺處結思令人
癭畢景來北山清樾鳴禽冷下見澄波生鱗甲蹙
百頃窈窕前林烟相戛兩峯影樵徑橫翠微莫辨
風篁嶺遙知清泠淵梵放相與永何時同君游佳
處得細領

西溪月夜懷大滌山二首

天柱峯頭見晴雪瑤壇玉洞暗相連石林夙具看
山癖也負知宮三十年

葉石林提舉洞霄宮嘗曰
吾知宮三十年未暇一至

孰謂吾爲
愛山者乎

雲根際夕抱冬心溪曲沿緣不可尋遙想郭文棲

隱處夜泉孤月萬松深

金繪直自湖南游桂林歸賦贈

西南山水敵清都天與詩人縱目殊郡有顏公稱
二始溪經元子署三吾鉤藤酒美能攜否桂布衣
輕得浣無笑我平生寡游歷相逢子細問姻隅

讀五代史二首

五季方龍戰濁亂失昏曉士有苟祿者傾身以營
飽遐哉鄭先生冥心棲靈顙松脂去三尸獨立塵
壻表

吾愛張監軍心爲巨唐有不知鬪雞兒自取竟相
負刑餘誠何傷報韓同不朽區區六臣輩晝日但
顏厚

江上訪金壽門出觀顏魯公麻姑山仙壇

記米海岳顏魯公祠堂碑拓本

珍微宋版印

雲沙繞村南小築如鹿柴去聲掃地焚香人相見一
瀟灑論書近攬拾勿事徵倒薤側聞麻姑壇名蹟
興先邁餘髮時垂腰丹砂亦狡獪有無海揚塵故
地今神界堂堂小顏公頗喜究奇怪波瀾縮遁麗
接待記仙話陶八碧霞丹入嚙若沆瀣汝州死大
節竟等蛇蟬解顛人述其事穹碑字如蠆緬彼天
寶季豔煽金鏡壞二十四郡中義士抱耿介獨抗
阿瑩山聲振哥舒敗晚令使賊庭讒口足類齟卽
云歸羅浮乘風固可快靈均爲水仙理有說非註
持此語故人相顧發長喟落落青瑤鐫當見百靈
拜坐深地爐灰浩歌共決眚

同南畹二兄游河渚飲沈晴川書齋

丙申下

到來知不易遠近引漁謳野水中開閣交蘆外倚
舟峯陰含古色梅凍得清愁漫比平原酌高人肯
見留

寶蓮山是韓平原故宅

霧閣雲窗付渺茫平原事往徑全荒居人不識太
師竹風葉幾枝搖夕陽

題沈其章秋林積雨圖

黯黹秋郊陰淋漓愁霖晦作此雨點皴濃如五斛
黛堆阜互起伏徑術迷向背目窮中林深卻滴梧
葉大數閒尖頭屋溼雲垂霽霽潤疑生青苔漏欲
添白蓋勿謂炊烟遲此中有人在

觀吳耕民所藏唐泰山摩崖碑拓本同繪
占作

羨君少年癖好古曾臨日觀登天門穹崖彩翠忽
明滅雞號下見扶桑暎開元天子勒銘在苔滑不
憚兩手捫爲尋墨本完好寡過客求索民胥冤梯
空緣壑歷至險實惜鉅費哀驚魂野火燒裂風雨
碎連紙珍似收璵璠兼金購此得舊拓坐客竦視
息衆喧八分飛動六百字鸞飄鳳泊神明存當年
東封有本末燕公爲相開其原誰與異議獨乾曜
廟堂那念供頓煩惟侈海宇已殷富思以大典誇
黎元金泥石礧事非古萬乘帳殿勞雲屯天章震
耀復嚴謚御墨揮灑如飛鸞未聞虞舜昔封禪大
書深刻留巖根況兼本命禮西嶽金天位號何雄
尊述聖頌得呂補闕豐碑離立蛟龍蹲岱宗事盛
過太華遺制遠與乾封論須臾時世易天寶兩京

瀕洞風塵昏青驪蜀道播遷日百神不效前驅奔
乃知用事睹符瑞史公載筆皆微言北里之禾鄙
上黍秦漢故轍徒紛繁卽如此碑亦炯鑒延秋門
外哀王孫濡紙脫文一感槩排翮思作摩霄鷗

感秋

炎景忽已往素節來有期西池日夕涼風雨飄無
時高樹易爲響離蟬如自悲誰能慰繇思非無酒
盈卮

秋日同王菊存汪青渠楊開緒渡湖至壑
菴由幽居洞上看摩崖家人卦登慧日精
舍訪亦諳上人際晚下山尋明昌化伯墓
不得汎舟而還得詩四首

延緣截鏡面一湖殊陰晴西南三五峯雲氣縷縷

生孤櫂卽前浦翹鷺涼不驚朱叢林表燦綠樹崇
岡纓遙聞微鐘響旁見孤塔明南屏忽覲面蒼翠
紛相迎水天寂於夜到岸菰蒲聲

注目望山坳靜侶若孤往隱見草閒泉時有脩蛇
想清風散木魚佛屋藏篠簜度橋潭鏡皎入洞岳
楹敞竒篠中復穿微徑折屢上快觀涼水碑義取
風火象摩崖擅八分遺跡成俯仰秋氣松際來吹
作居巢響

絕頂露扶闌懸崖度禪榻爲訪贊公來不憚芒履
踏入室憺忘言風樹自相答四角鈴鐸鳴衆綠何
獵颯俯見北峯雲奄與南峯合雨腳渡湖至驚起
兩棲鴿一氣中迷濛天鏡互開闔稍霽烟鬟靚日
射黃妃塔了然清淨界幻象無不納同游五六十

看雪期深臘

取徑下仄磴秋草自作花山風襲人衣叫噪白項
鴉飽聞外戚墓厚葬崇驕奢當時議禮者恩先丁
傅家吁嗟百年後變化如蟲沙大儒椎控頤金棗
出隧斜欲往弔興亡覓路迷三叉暝色起前林喚
渡牒子挈晚湖波皴鱗衆岫興陰霞歸時想清景
漏鼓忘頻擗

池上

高柳初髡倚晚汀幾時來此補魚經昨宵知有稀
疎雨滴破一方青白萍

佛屋閑題

梵夾意蕭然安居不離禪人依淨綠水地輒妬羅
絲已菊將梅候初霜欲雪天何妨臂鷹手自送佛

前錢

白香山水月觀音讚云淨綠水上虛白
光中地觸柔輭似妬羅縣見法苑珠林

九里松至西山道中同金壽門周少穆王

雪子作

不負幽尋出郭門
木絲裘暖趁朝暾
山遮壤塔可
十里樹裊孤烟自一村
高冢多風松落子
空田無雪稻生孫
須知歲晏人游少
正要諸公細討論

過宋通問副使朱公少章墓

突兀殘碑立古阡
行人猶記紹興年
青衣已見君王辱
白髮何期使節旋
老淚冰天他日恨
遺聞曲洧至今傳
一抔築並花宮地
夕唄晨鐘更惘然

冷泉亭

衆壑孤亭合泉聲
出翠微靜聞兼遠梵
獨立悟清暉
木落殘僧定
山寒歸鳥稀
遲遲松外月
爲我照

田衣

靈隱寺月夜

夜寒香界白澗曲寺門通月在衆峯頂泉流亂葉
中一燈羣動息孤磬四天空歸路畏逢虎況聞巖
下風

曉登韜光絕頂

入山已三日登頓遂真賞霜磴滑難踐陽崖曦乍
晃穿漏深竹光冷翠引孤往冥搜滅衆聞百泉同
一響蔽谷境盡幽躋顛矚始爽小閣俯江湖目極
但莽蒼坐深香出院青靄落池上永懷白侍郎願
言脫塵鞅

蓮居

宛似游墟落疎籬曲繞門僧房倚樹腹梵板響城

根犬吠驚風葉鴉歸識水村流傳李先輩瘦硬小

碑存

中有李長蘅書碑絕佳

西溪汎舟遇雪

以下
丁酉

孤櫂不覺遠窈然流水深春烟沈大嶺密雪響疎
林白社何年約青蓑舊隱心推篷起寒色雙屐阻
幽尋

題陳子健所藏宋人畫太真按舞圖

柳芽將吐菜甲新西堂小雨愁青春有來此畫傳
院體調鉛寫黛知何人三郎深宮常晏起獨愛霓
裳譜風水太真能舞作舞詩羅襖動香香不已念
奴按拍寂不喧罷敕雜樂呼梨園至今看畫尚有
恨韞塵未歇烟塵昏良工好手誠難遇周昉張萱
具生趣勸君裝潢藏弄牢他時好待添丁付

西溪歸訪王旣咸

牆東君公清且賢留客纜我西溪船霍山廟前看
殘雪溜水橋下添新泉梅開香破缸面酒日出暖
射牀頭氈春濃更當挈伴過菜花繡徧村村田

三月十三日游法華山

連山背湖西地脉聚而凝婆留霸氣餘峯嶺尙雄
勝嘉我同游人穿榛得荒徑陽坡鼈羣披陰崖龍
腹亘天風鼓蓬勃白雲若沸甑置身萬松顛心曠
肅觀聽紆回下前阪翠樾出僧磬入籬泉偶枯方
井鑿亦澄繡田盡雜花烟中笑羣媵茶戶競物利
衣短不掩脛采摘泣晨露山謠頗相應酌酒墟墓
閒作達榼隨罄芻狗本幻誕石馬久光瑩神絃走
村氓縹緲事愚佞洞簫裊林木篝火繞巖磴因之

珍微宋版印
日夕還嵐彩眩難定此境天所遺庶以忘蹭蹬望
中青帘曳猶似攜餘興

北郭紀游四首

散花灘

當年張外史此地有行窩喬木居人少蒼烟廢圃
多道心遺外物身事託樵歌最好灘前水春來似
熨羅

江漲橋

長虹偃郭外勝日記偷游簾卷橋南樹花飛水上
樓客行津鼓動天遠峭帆收俯仰悲人代茫茫對
碧流

妙行寺

棟宇何年締規模壓一城烟霄騫鐵鳳風雨吼華

鯨臨水春船集巡廊午日明喻彌陀畫佛不見斷
碑橫余嘗見元郭天錫客杭日記云出北關門妙
像次禮古觀音像相傳唐
朝塑者今則俱無之矣

西馬塍

行徧馬塍曲春風無處無酒堪澆白石墓已沒黃
壚接樹看鄰媪傳芭走里巫移栽入朱戶舊事續
潛夫宋姜堯章葬西馬塍蘇石挽之云幸是小紅
方嫁了不然啼損馬塍花小紅范石湖所贈
青衣也見陸友仁硯北雜志

晚步

斜景忽已暝流鶯時一鳴水光知月出花落見風
行僻地非遺世新畦欲耦耕孤吟少儔侶發興自
江城

園居和蔣丈靜山

市塵拋後稱閑居好結南隣分有餘
迳相過惟礙竹小畦旋往欲刪蔬
不離板閣池光動自下蘆簾暑氣
疏寄語輪蹄馳逐客清名持較定
何如

秋分日呈陳楞山兼寄亦諳上人

拉瑟西風故故催江鴻社燕共裴回
那知極浦水花老又接繞籬岳桂
開隔歲相思同濁酒幾旬塵土挽
純灰瘦權更在高寒頂清露翻經
坐石臺

題水居消暑圖

峭壁插天下無地萬荷喧雨境
脩然適來披畫當秋爽尙想風
亭散髮眠

友人貽頻婆果賦謝十韻

是物幽燕貴雕盤獨薦時芳華
存梵夾蔽蒂補風詩

朱竹垞太史曰下

舊聞云疑卽甘棠

楚楫名空得唐梯摘易爲乍

隨籠壓騎還想雨低枝澹白腮輕柰勻紅頰肖梨
靈根吳客少俊味細娘知齒冰臨邛渴香迷下蔡
疑枕函聞逆鼻采蘭雜志頻婆果夜瑤席顛支頤
墜地誰工寫宣和畫譜畫墜地傾筐肯見遺玉窗
春夢裏好好寄相思

雨夜述懷十三韻

癡雲催暝早坐覺瀉幽淙院靜無來雁天陰絕吠
杉薄寒初淅淅孤燭自幢幢觸迂愁難斷音崢嶸
意未降畏途同歷阪殘歲類奔瀧入世憎高髻澆
胸漫滿缸前塵青豆舍舊夢碧油窗曲踊何煩百
吹簾信少雙浮沈仍蠹簡浩蕩想漁鱖虛冒棲遲
好須安里俗吮朋歡違尺素詩敵束空杠倦枕敲
還醒清鐘遠更撞幾時深卜築繞戶種雞腔

無盡意齋寒夜用覺範送元老住清脩韻
竹雪欠清聲
竝笙有餘韻
西齋擁爐坐
燈火耿幽
暎微緒
獨繭繅長
謠適真性
朱門貂襜褕
夜游付
一哂
生年號迂疎
厲歸真自號
錦溪迂疎子
窘步遠捷徑
寒林
聽脫葉
落固不愠
何妨戒香熏
詩格與僧近
聊以文字禪
解此塵土恨
折艷黃梅花
是名意無盡
歲暮答王旣咸

北郭幽棲一水涯
松毛蓋屋蘚侵堦
詩來慰我不稱意
歲晏憐君獨寡諧
臘鼓無端喧委巷
春燈取次翦閑街
疎梅半樹展書卷
賸欲此中尋好懷

春寒

以下
戊戌

初月已旣魚
上冰峭寒陡作相
憑陵濃陰黦黥天
地凝欲見白日
何時升紅舒翠坼
力未勝有如志

土坎壩仍空齋枯坐粥飯僧噤痒誰送半臂綾夜
聽街鼓睡不能紙窗升降風中燈侵晨更覺被有
棱所遭偶爾吾何憎只思布韞游馬塍花氣一片
丹霞蒸

春日逢施謂伊話舊

十年墜雨惜相違朋輩如君僂指稀雞肋只今殊
少味虎頭何用盡能飛秋湖憶共青油舫晚寺曾
尋白竹扉回首昔游都在眼杏花風外一霑衣

二月二十七日臯亭山下看桃花二首

登船出郭卽通津不負佳游及此辰駘蕩年光挑
菜渚支離身事看花人戲鵝語鴨漁莊靜烟暖天
清水寺春當境底須頻恹酒銑溪如許已成塵
臯亭山下集游船半載尊壘半管絃並岸斜看花

影倒落英亂點水文圓東風不信將三月往事無
多又四年只有吳娘知可惜折枝繡滿禿襟前

首夏雨中卽事

不斷迎梅雨散絲水村誰與共心期晝眠有味低
回久殘客無情報謁遲乍暖乍寒開苦棟澹紅澹
白到戎葵平生閑卻籠鷹手自試隄麋寫小詩

病目戲成

微疾何來解相惱焚香埽地一閑身且輸名士誇
巖電欲共高僧究眼塵細字難拋工作祟好花飽
看已過春阜羅爲障非吾事養就疎慵學避人

月夜舟出北關同壽門作

出門輕百里猶喜共君行雅愛聞吳語誰能計水
程野橋迎月直斷岸見烟生涼蛤爾何意喧眠到

五更

菱湖

到眼忽成市千家匳鑑開魚多論斗賣菱好及時
栽歷歷帆斜過汙汙水倒回有人葭莢外銅笛或
吹來

碧浪湖

白塔紅亭宿霧收放船港口足銷憂蘆分山色離
披去水接雲容淡淹浮風物三吳何處最陂塘五
月已如秋樊川可是詩情減不爲探春也合游

同壽門訪長興鮑西岡明府留宿縣齋卽
事

聞道吳西俗最佳扁舟聊復散幽懷詩人來作長
城宰客子如停小謝齋落魄自憐仍楚製荒唐多

分續齊諧

梁吳均邑人著續齊諧記

凌晨忽起游仙興震澤包

山詎有涯

督牛犁我田歐陽圭齋句也壽門爲圖因

題其後

高人思食力所寄在扶犁自足一生事何知四體
疲烏犍行水淺白鷺下田遲緩緩逢鄰叟香秔問
可宜

同壽門游若溪廣惠寺是陳武帝故宅

寺中

有井相傳帝初生時取水以浴忽涌起數尺明歸熙甫作令時刻銘其上

若溪走玉龍連山抱千層水風引到寺老樹青鬢
髻上巢大觜鳥下絡交枝藤王氣久死灰陰怪爭
來憑陳帝起里中樵牧猶相矜擣青一旅奮驅賊
如秋蠅悲哉蕭老公不得顧眇僧跛奴亦何爲大

命歸吳興此地卽豐沛精爽依禪燈長爪攜淑儷
雉山望雲蒸我來漱井眉銘辭義峻嶒傳是洗兒
日寒溜湯泉騰更著辱井戒不覺欹歔增可憐馬
上郎義憤尤足稱成敗有天定隙爲英雄乘煌煌
江左業從此期恢弘身後那可料暴骨據讐膺古
愁起暮色閑話同詩朋循廊土花碧鈴語搖觚棱
蘋洲曲十首和鮑明府

日落采蘋去江南春色明不因洞庭客那識是閨
情甘光庭兼明書解柳惲江
南曲云是樂府閨情之遺

曉過嬰蘭堂逢見嬰蘭婦爲采黃藤桑方出摻素

手

董斯張吹景集云吳越備史錢錫有嬰蘭堂詩
古樂府柔桑感陽風阿那嬰蘭婦唐人采此爲

名耳

談鑰吳興志
鄉土育黃藤桑

郎羨合羅絲水凍色更鮮儂羨同功繭一生作纏

珍傲宋版印

系謝鞏淞西吳枝乘湖蠶最上者曰合
羅絲縣以兩蠶共作繭者號同功縣

管山西人見松雪誌項臯謨筆記云吳中有韋娘賢

後更爲爲

後更譌爲
茴香髻也

蝶山人謙之吳興記車溪出笑魚明茗上祝翁家藏
唐山斫繪書一編有舞梨花柳葉縷對翻峽蝶

蝶山人謙之吳興記車溪出笑魚明苔上祝翁家藏
唐山斫繪書一編有舞梨花柳葉縷對翻夾蝶

等名

來新唐書程邈北二里有蒲帆塘刺史楊漢公開而得蒲帆因名周密齊東野語唐樂府云蒲帆猶未識爭得一墩

來

帆猶未織爭得一歡
成舟子呼造帆白歡

浦宋章淵伯深居若溪有槁簡贅筆云羅帶十二摺吳中下里之曲也談鑰志湖趺菱色紅而大

浦

宿

吳興多蠶豹脚者尤毒東坡詩風定軒窗飛豹脚是也惟江子匯無之

梅子雨

初過儂家水浸扉淋灰應有禁不出浣春

衣

張稚通若紀湖俗夏至日斷梅立時半月內禁淋灰浣衣

雪溪水四合

飛英塔兩重住近墜釵橋早晚郎相

逢

太平寰宇記雪溪在烏程縣東南二里凡四水合爲一溪李詡戒菴漫筆湖州飛英寺塔中空

復有一小塔甚奇巧墜釵橋見勞錢湖州府志

吳興歸舟作

風俗家多具畫船
苔山浮碧在門前
自牽賤事忽忽去不爲蘋花住一年

七夕宿澗西微上人房

入寺松欒深幽涼
蘇暑病崖上飛雨收林中微月
映窗燈翦復翳經聲出蘿徑空山落秋河無人同
眺聽

秋夜雨中集汪抱樸齋

愛君池上好不厭夜來頻微雨宜幽鳥初涼健酒
人蕭蕭添白袷點點到青蘋共有悲秋意商歌激
四鄰

雨

瑟瑟中宵雨聲繁遂達晨長風吹不已幽草洗俱
新閉戶耽幽思褰帷起病身惟添上池水煮藥更
應神

八月十五夜對酒作歌

院宇霽夕氣圓鏡初徘徊紛紛流汞瀉青桂顚顚
白露凝蒼苔旣佳光景惜芳夜何用絲竹鳴相催
眼前無二豪卽時有一杯天上愁浪寄地下憂空
埋倚門抗麟亦徒爾置身或在才不才淋浪劇飲

自起舞寒輝滉漾侵衣來妖蜚決吻吾且待仍看
向曉無纖埃

是夜
月食

秋園

瓠架初除搖落時人閒秋士漫生悲牆東小隱甯
非計竈北清狂枉自奇露白稻香聞吉語天青蜚
咽動幽思朝來郭外山容爽爲報閑居取次知

懶

穴居水游不可測鵜鵂何事濡其翼祭魚黠冒知
禮名祭罷春江覓魚食捕時爾莫訴煩冤畫板爲
鰲銜主恩丹砂不惜和取髓好補吳姬如意痕

三徑草堂晚桂

陽春桃李花綴枝趁妍暖偃蹇青桂叢花中亦中
散隨時有不堪養生遂成懶結根幽人屋枳櫚俗

珍微宋版印
喧斷高秋月餘閨疎香吹始滿分無樂天曲新調
按銀管聊學晦堂禪微言對偏袒寄語主林神知
希我自罕

隨意

隨意三條徑斜通十畝塘閑非行散得樂豈注書
妨水碧全涵日林紅半帶霜何須鄙夫有寓口一
相羊

夜雨薄寒

閣迴窗虛最寂寥臥聽撼撼葉辭條寒初驟入蟲
幃薄雨滯旋看蠟照銷一石飲餘聊善謔四愁情
在自長謠若爲學得頭陀法忘盡前心坐徹宵

山夜雨詩不學頭陀法前心安可忘

初寒

塵務經人心思如智井涸雙轂轉不停淒飈陡然
作古人期立名噉盡畏獐貉千秋萬歲後遺跡付
寂寞何當攜酒瓢東郊看黃落直追斜川游不羨
爽鳩樂

城西讀書雜興二首

烏几麝牀位置便此身暫寄亦隨緣且疎應對如
高坐未有神仙學稚川世路淹回魚上竹歲華飄
忽鳥驚絃時時夢到曾游處溪畔苔花壓釣船

蕭然無客似離羣都護邊書忽遣聞計日止戈應
送喜何人磨盾欲從軍湖通舊引穿溝水城隔猶
屯過嶺雲誰向壽安坊裏問廬陵風調有遺文

壽安

坊一名花市元
張光弼故居

於潛王柘村明府招飲寓齋

古屋通津外官閑客復來危檣依水立疎樹向門
開坐少於潛絹香餘下若杯明年天目約飽看白
雲回

曉至湖上

出郭曉色微臨水人意靜水上寒霧生彌漫與天
永折葦動有聲遙山淡無影稍見初日開三兩列
舴艋安能學野鳥汎汎逐清景

十二月十二日大雪用東坡聚星堂雪韻

寒空似墨吹雲葉今年真見頭番雪魚羔醺酒任
豪奢擁褐攤書助清絕渚田飢雁跡欲迷深霧跋
鳥足愁折積盈暗隙曉光早灑急初更衆聲滅風
饕旋作怒虎吼臘殘已似脩蛇掣細填佛刹妙莊
嚴靜檢詩材棄華纈會參老宿問當機

中峯雪詩
誰解當機

作水看

安得清言紛鋸屑有人鈴馱犯淩兢輸我蘆

簾看飄瞥一篇語奇萬口傳

東坡詩序云于艱難中特出奇麗

明

年餅大千村說江干往事更回首帆飽長淮思老

鐵

往與楊山雪中游江干今楊山客淮故及

次韻酬石貞石雪後過訪

安得孤清一破除近來交舊頗彫疎竹窗正在聞
風處雪徑惟君著屐初僕射樂猶輸飲酒諸生業
轉困傭書江干想見寒林好亦欲時時過隱居

於潛王明府寄白朮

市中何處覓靈蹤滿把雲腴手自封藥重一丸慙
魏帝復誇五葉謝神農塵區有藉能蠲疾福地於
今可鍊容爲向小窗抄序罷幾時飛鳥得相從

休詩

白月半窗抄朮序
朮序紫微王夫人作也

臘月二十四日風霰交作

塗竈傳茲日東京俗尙存祭猶名老婦靈欲乞嬌
孫微霰侵敲枕淒風助閉門久耽蕭寂味甯與子
方論

樊榭山房集卷一

樊榭山房集卷第二

錢唐 厲 鶚 太鴻

詩乙

雨中耕民寄新詩兼貺丸藥奉答二首

以下

己亥

抱痾臥旬日春物遂已深流光惜晷晷天色空沈
沈密雨沍苔徑輕雲冒花林花飛憺世慮苔積娛
冲襟開緘有佳約霽景猶可尋
若士思遠游達人謝拘束身如腰鼓顙四塵自奔
觸豈無上藥草病求恆不足惠而思好我更徵桐
君錄顧我寡裨益拜命亦良辱

三月十五日晚泊東新關

解纜細雨吹烟昏叢蘆高柳搖空村晚泊沙汀見

燈火田家笑語生春溫我生汎梗遽如許難得扁舟同舊侶休憎一夜風打頭明發青山堪與語

虎阜卽事

塔迴廊迴燕燕飛送春人去戀斜暉似嫌瑩確侵羅韞卻要殘紅作地衣

同青渠抱樸游惠山

梁梔日出宿雨捐主人急喚沿溪船清尊在船興已發剡剡麥秀翻平田游人愛游較我早爭入柳港吹香繇名園在眼昔夢到紅橋翠棧相鉤連九龍山色滿屋上妙有流水巖根穿琤瑤下赴照軒檻木陰霽鬱堪暑眠尋源且復入古寺泉頭小閣浮茶烟百飮汲貯轉甘冷遠道拆洗煩烹煎

拆洗惠山

泉見清波雜志

南泠廬阜味奚似屈居第二吾猶憐平生

飲水具真癖烟包雨笠同枯禪千羨萬羨竟陵子
頓爽塵吻甯無緣道人鶻眼照泉碧松聲爲拂膝
上絃罷琴落日我徑去塔影送客東峯巔

題對山開卷樓壁

僧樓恰對惠峯開寒玉泠泠步履回待與山靈話
疇昔杜鵑紅處我曾來

游蕃釐觀

淮甸何年祀媼神雲階月地鎖青春隔江遠見山
凝黛斜日初來雨洗塵髣髴韋郎情是幻淒涼花
史怨如新無雙亭下青苔色閱盡閑游多少人

同程友聲紅橋夜汎

月黑水深荷葉路涼螢無數繞船飛與君今夜紅
橋酒不貧揚州白苧衣

登平山堂

落日堪銷暑疎蟬喚客游
析酲嘗蜀井過眼歎迷樓
天淨山容出堂空樹影浮
昔賢遺勝地撫檻小遲留

初秋寫懷

風雨軒窗枕手吟
乍涼曉覺滿西林
年光又共草色變
秋思有如雲影深
坐對畫叉添寂寂
閑尋茗盃試森森
第三橋畔萼香滑
欲動歸橈一夕心

題陳楞山秋林讀書圖

橋隱迴溪樹隱樸
人閒有此小林垞
西風日日翻書葉
吹得數峯如許青

西溪福清竹院

溪行興不已竹中得安居
斜日入深碧冷然風更

疎牀下解脫履几上乾竺書山僧不出戶情滅心
晏如

十一月一日自西溪汎舟之餘杭

性拙見山喜匹如故疾失餘杭有勝踐梭艇冒淒
颼疎林翼霜岸破屋列烟術搖兀溪光中煜煜上
初日平野皆令姿疎澹狀非一況逢載穫後田水
涸已畢曠望愜所宜漸進叢篠密喧雀迎舟前幽
討自擁膝稍稍居人稠佛刹林外出西峯若有期
消搖聊短述

南湖晚望

清絕茗南境晚來歸鳥翻草枯羣漱出烟起亂峯
昏僻邑無驅馬閑農早閉門叢祠望燈影神力至
今存

漢令陳渾開南湖捍水有功湖旁廟祀甚盛

游洞霄宮

大滌元蓋洞天夙所慕時時飛夢凌孱顏茲辰奮
足遂躋討芒屨豈憚山行艱初從南湖歷四井霜
清日出羣峯靜紆回路轉金綫潭鑑奩不動澄嵐
影偶逢捧子爲指迷深入攢林竦壁得異境青山
九鎖勢更殊千尋拔地秀不孤松栝溼翠交撐扶
石橋流水聲可娛道旁碓響雲母粉巖隙乳滴羊
須珠傳聞舊有無骨箬可等羅浮古蹟竹葉符帝
留瓊館此奧區圓殿高峙凝塵無其餘廊廡雖湮
蕪蒼簑萬个爲笙竽寒風噫竅洗毛骨白雲上下
如飛鳧我思郭文舉無情木石相爾汝何時月底
騎虎歸泠泠澗上聞仙語我思鄧牧心黃冠遺世
來煙岑幽泉滌硯作山志俗士未許窺清襟自從

籀郎作相年祠官往例縻諸賢提舉惟有李忠定
栗主塑像永永無祧遷尙餘御筆觀虎臥洞天福地額宋
理宗御書寂歷閑階少人過真茶啜比換骨膏半日盤
旋雜行坐天柱峯大滌洞瑤房玉宇恍如夢太息
天寒日短不得游留與他時策杖尋清秋

喜雪

試雪連朝雪已成彎跼板閣冷光生斜飛堦面偏
多態白膠池心大有情炙硯可無今日興打窗仍
作去年聲水仙已萼黃梅破共領人閒第一清

雪晴

積雪色固佳消雪無留痕南榮聞餘滴東曦暖微
溫旣霽風漸柔淺綠含陳根茗穎行有時靜念造
物恩余拙謝百事抱影寄空村淨名經卷在昔誦

尚默存婆娑一室閒妙香領無言

次韻答繪卣春日見訪不值

庚子下

東郭半春色能來破蘚痕隔林機躡響比舍井泥
渾行藥非過市看花乏應門棲遲如可託重宵顧
荒園

原作

錢唐

金志章

繪卣

雨後春泥輒行吟認屐痕菜畦迷遠近池水漲
清渾看竹過隣舍聞鐘憩寺門詩人不可見惆
悵出東園

四月十日湖上作

愛來湖上作浮家艇子衝波一道斜日晚水仙祠
下去青山影裏采蘋花

九月五日南山紀游三首

石屋

秋晴風滿山破寺娛清晝石作鬼面皴樹比佛胛
瘦天橫尋丈碧幽幽坐雲構摩挲辨題名苔蝕半
脫漏

水樂洞

徑折穿羊腸複洞空響接清游宛前事七稔等交
睫裂石出怪杉黏竹見寒蝶乞此流水聲洗我雙
荷葉

理安寺

老禪伏虎處遺跡在澗西巖翠多冷光竹禽無驚
啼僧樓滿落葉幽思窮扳躋穿林日墮規泉咽風
淒淒

蕭山

喚艇晚來急天陰雲欲凝樹紅迎北幹江白隔西
興賣橘山家賤歌菱越女能東游興不淺篷雨響

疎燈

北幹山名

山陰舟中四首

寒雨欺晴曉未歇故添溼翠到船窗西風併作銷
魂思新雁一聲飛渡江

白塔湖邊孤櫂開風回忽卷亂雲堆越山絕似西
施髻朵朵翠翹浮水來

幽泉細細葉蕭蕭白石清沙舊板橋最好晚山堪
畫處一帆風裏送歸樵

鏡水稽山照眼清吳兒未肯寡詩情愛閑欲向天
公乞采若籠鵝足一生

夏蓋湖

幾曲蘆漪外如梭艇子過駕風波忽大到海地無
多茫昧思前古悲涼發慕歌事見晉書
夏統傳寒更何處
泊髣髴聽鳴鼉

義石謠

并序

慈谿縣長溪嶺下有石翁仲明故宦某墓上物也
後嗣衰落將鬻於他姓夜夢翁仲告曰吾事君先
人久義不可去明日集衆牽挽之重不可移強舁
至數武遂折焉鄉人奇其事爲亭覆之顏曰義石
予過而作是謠

武擔有石鏡祇照妖魄啼昭陵有石馬但解中宵
嘶長溪嶺下松楸地石人將移寧隕墜無數青瑩
照漆燈憶君長是垂鉛淚溪風颯颯石人語吁嗟
得新毋捐故

展先大父墓感賦

吾祖墳頭柏先親昔淚斑生遲違撫抱僑籍隔家
山遺德耕耒內棲神恬漠閒酸辛纔一到酹草想
音顏

鶯脰湖

帆影挽不留依依掠沙渚豁然晚湖開平遠迷處
所病柳隱漁屋孤烟識炊黍單舸若汎鳬得魚網
自舉嗟予紛塵營衛寒久延竚同在一水閒寸心
肯相許西風不見待吹斷蘆中語

姑蘇旅舍夜雨

他鄉今夕雨漂泊暫停橈不滴無愁地偏聞少睡
宵風傳街柝冷雲溼寺鐘遙多謝殘燈火留人鳥
鵲橋

欲游滄浪亭因雨不果悵然有作

喧闐海涌峯岑寂姑蘇臺仰止濯纓人兩度仍空
來水竹不寓目吳船還獨開想見破窗下雨點寒

莓苔

野蔓盤青入破窗蘇子美句也

新豐

百里丹陽路炊烟聚一區有霜侵旅鬢計日改川
塗水落塘猶在天寒酒可酤詩人例辛苦蹤跡滿
江湖

晉書張闓爲晉陵內史立曲阿新豐塘漑田八百頃葛洪爲頌陸放翁入蜀記云太白詩

南國新豐酒卽指丹陽之新豐

廣陵寓樓雪中感懷

北風凜削肌柳花溼而墜小樓更添寂薄酒不成
醉入夜短燭孤羸僮已先睡何人煥寒讌隔院喧
鼓吹沈湎居者心浩蕩游子意平生澹泊懷榮利

非所嗜西笑詎云樂明發難自棄茲來捫空囊翻

爲故交累

謂程友聲

因思在家貧懷佯尙高致束書細

遮眼疎花香破鼻紙閣無多寬迴隔飛塵至因之

問故園南鴻煩寄字

寶應舟中月夜

蘆根渺渺望無涯雁落圓沙幾點排明月墮烟霜
著水行人今夜宿清淮

渡河

北來始作汎槎游晚色蒼蒼望裏收一綫黃流奔
禹甸兩涯殘雪接徐州古今沈璧知無限天地浮
萍各有謀明日輕裝又驢背風前慙媿白沙鷗

驛車口號

輾輾雙輪盡日顛黃塵一隊逐蘆鞭柳絲未吐梅

將萼夢到西湖罨畫船

宿遷

漸遠江南地難禁朔氣威檣烏河上集塞雁驛邊
飛冰勁妨行轍塵輕襲客衣明燈投野店草草亦
如歸

郟城

下邑古郟子寒朝脂我車亭猶傾蓋舊俗是問官
餘烟舍凝微雪風餐芼凍蔬飢時聊慰藉行役意
何如

過沂水

征轅指沂水驚沙落如雨禹貢諸大川北來數凡

五

震澤沂

靈源自艾山其乂始敷土遠會陪尾流

東向滄溟吐窮冬方凝冰文漪靜不舞居人鑿用

汲色瑩白如乳匪云川無梁橫板劣接武懸車藉
衆舁索錢難饜取喧逐久乃過偪側良亦苦何時
輿梁成神明載縣譜從此隔岸山快展兩眉嫵

半城

雪消半露翠孱顏
榮盡征塗犖确閒
畫看最佳行
最險將車初上大弁山

弁作平聲

蒙陰

衝風苦愛帽簷斜
歷尾無多感歲華
卻向東蒙看
霽雪青天亂插玉蓮花

羊流店拜羊太傅祠

茅屋疎林雜晚炊
羊公祠下獨來遲
探環已失前
生樹墮淚猶存故里碑
盛德在人如昨日
清談誤世詎同時
雍容裘帶瞻遺像
深媿無才進些辭

泰安道中望嶽作歌

平生五嶽願未從真形突兀蟠心胷東游齊魯首
瞻岱百里遠見嵐光濃半天明滅千芙蓉羣山如
水皆朝宗盤車五汶豁雙目元氣迴薄開春容青
帝所宅神秀鍾富媪孕碧攢諸峯位當出震德在
木天喬萬狀敷葱龍尊如端冕秉璧琮嚴如闔戟
羽葆重陰陽闔闢百靈集魚雅想見乘蒼龍荒荒
輦路人不逢一枝安得扶瘦筇堆梨散棗無覓處
白雲猶護秦時松維神惠澤霑三農只今苦旱方
窮冬獻歲二麥望成熟玉戲快雪除灾凶

時山東雪未霑

足我來欲訪安期蹤八溟海外洪濤春天之五嶽

有東嶽矯首遙眄心怔忡征途鞭影何忽忽孤烟
一抹歸鳥衝不知氣象爾何物但聽木末敲疎鐘

謝道蘊泰山詩氣象
爾何物遂令我屢遷

晚次齊河

白日沒長林風埃滿客襟
山趨野寺斷烟入戍樓
深飲水防齊癭懷鄉類越吟
憩裝寒更緊釀雪未成陰

除夕宿德州

客裏休尋錢歲筵河干聊爾息吟鞭
荒村已是裁春帖茅店猶聞索酒錢
燭爲留人遲見跋雞防失旦故爭先
郎當遠鐸仍催起回首東風又一年

河閒懷古

以下
辛丑

瀛海盤迴地勢雄古情客思共無窮
錢工數處囊偏澀鉤欲藏時酒易空
三日開年歌吹寂一城飛轍往來通
獨憐大雅今銷歇誰向苔花問故宮

都下春雪懷里中諸友

春來旅思極，曹騰枯坐窗。閒類凍蠅撲絮，乍逢燕市雪。搖風不見米家燈，地爐勤撥聊添火。硯滴難融，可奈冰爲問孤山梅，息耗幾人游舫得閑凭。

南歸次琉璃河

一昔都亭路歸裝，只似初恥爲主父。謁休上退之書，柳拂差池燕河驚。撥刺魚不須悲楚，玉息影憶吾廬。

苦水鋪

苦水名初識，何年續水經。高榆齊剝白，時山東苦饑細

草遠連青牆，上驅雞過溪邊飲。馬停勞人歌一曲，顛顚有誰聽。

任城夜雨

城上陰雲覆酒樓
城邊行客苦車休
鄉心已逐殘
春雨一夜平添汶泗流

東臯閑居

白袷成新隱
青苔徧舊蹊
水明村裏外
樹罨屋東西
菜把官羊敵
茶香佛粥齊
慨焉思靜侶
安得手同攜

李森劫鉢圖吳耕民索賦

般羅迦婦色最姝
噉食人子充飢飣
彼鬼亦復愛其子
賓伽雙髻玉雪膚
山雲爲衣女蘿帶
撫摩不忍離
須臾佛以慧眼照
惡趣知具佛性無
差殊
定力攝入水精鉢
宛轉求出啼呱呱
爾時鬼嗔逞餘技
鳴笳連鼓相嘯呼
兩甄八陣聚什伍
頭角截業雄牙須
拔河絙麤挽萬石
雲車風馬來張弧
擲刀

作雨滿空際吐氣爲火緣都盧豈知是鉢屹不動
縱有藕孔難亡逋母慈淚等大海水五體投地稱
南膜琉璃喉出微妙諦汝噉人子無時無汝子五
百盛種類云何結念徒區區羯肌王女過去是不
持戒故淪兇愚能於我法修淨業還汝大寶光明
珠母喜禮足向調御本無有鉢攜其雛畫師何者
善狡獪細意渲染爲之圖人言可憎定不妄說鬼
聊爾相歡娛書生亦有弘誓願願勿瀕海生虎羆

是日聞臺
灣有寇警

五月晦日作

孤行但寂寂流光恒冉冉豈乏奔競途廁足畏朝
貶屋餘古人書高逸跡可檢食力慕徐程
何點苦無上水田二者附亦忝歸來
清吟

白日掩眈此綠陰閑養性惟以儉林風吹已逐殘
影翻筠簟少焉西山雲屋角生有澹翼翼雨氣才
沈沈夕陽斂向夜默無言草際孤螢閃

夏至前一日同少穆耕民汎湖

雨後看山綠繞城鏡初卷半湖明荷邊魚在香
中戲橋上人從畫裏行料理酒杯無俗物銷除席
帽足閑情水風忽送涼如許搖曳新蟬一兩聲

西湖竹枝詞三首

楊柳作花湖水香湖上樓高不見郎西山惱殺冷
泉冷南山愛殺長橋長

新隄桃李能白紅畫船來往只湖中郎怕傷春復
傷別儂怕愁水又愁風

儂住西村暮又朝摺盡畫裙金綫條女兒山頭新

月上照儂自掃雙眉嬌

晝臥

妄心澡雪盡教空長日關門一枕中
跂腳飛塵難我婉支頤清夢許誰同
黑驚燕子翻堦影涼受槐花灑地風
慙媿夕陽如有意醒來每到小窗東

題文五峯蘭亭圖

江東禊事晉羣賢內史風流老筆傳
水色曲如蘭上里山光青似永和年
一亭雲日供觴詠四面松篁替管絃
展卷好留陳迹在莫隨醉本散飛烟

七月十七夜對月時將之婺州

繩河斜影落風林獨掩柴關露氣深
好月不嫌遲照坐已涼何恨早攤衾
事過唐肆空求馬跡類寒枝未穩禽
爲報東陽山水道安排烟翠待清吟

湖上秋陰同陳楞山符幼魯施竹田張東

扶作

秋氣在蘭舫澹然諧素心蕭雲翳空水滅景墮遙
岑欲寫尤難狀將留不可任絕憐歸渡晚疎蓼一
叢深

晚發江干

落日挂帆去背人飛鸛鵝風烟秋半淨江水晚來
波漁浦山爭出樟亭樹忽過尋源意飄蕩一聽越
鄉歌

富春

富春縣前江勢奔危樓如畫俯山根林林人影向
沙市葉葉風帆下海門秋入遙空無寸翳旱經焦
土有千村田家正墮憂時淚安得新醅倒瓦盆

江行曉望

膠角遠村雞江行俄已旦推篷貪清景涼露半天
散遠洲信逶迤盡處如玦斷連山聳蒼翠緣流競
秀粲水際烟輕明忽抹山之半徐引青楓端漫靡
不知岸阿那幾幅帆日華相凌亂漁商互通語來
去乘汎瀾微微遞遙鐘隱隱見樾館悟此趨向歧
層波媚獨翫

夜泊桐廬

弭楫桐君山欲謁桐君祠桐君不可見月黑山參
差是時秋江明遠近生寒漪村深犬吠客夜靜鵲
繞枝臥聽戍角聲悲雜松風吹作客山水鄉塵土
何由緇

七里瀨釣臺下作

山入嚴灘合沓遮灘聲盡日走雲沙禽魚不解留
行客鄉里唯聞重釣家嫋嫋涼風帆影轉層層僧
舍竹光斜補脣晞髮詩魂在搜徧枯腸自煮茶

石塘洪阻淺

甘雨一掬慳秋水落涯涘舟喧積石橫月在行客
起褰裳涉微流寒碧亦可喜寄謝嵩高人毋憂傷
玉趾

望金華山出雲俄而大雨

齋心訪名山駕言入金華金華迢迢不可到但見
翻風撼石樹色何槎枒籃輿徑穿城外去一桁遙
青亂鋪絮森然三十六洞天正在白雲離合處忽
如饌餽炊乍濃又訝奔馬來何峯其閒坳涌墨翻
汁俄頃變化隨飛龍不辨山巔沒山腹山與雲旋

溼淋漓冰壺洞中水簾倒卷珠琲垂散作秋霖落
雲族雲中髣髴懸霓旌神仙得者皇初平石羊叱
作雨工起奮髯抵角跪且鳴噴灑林壑天瓢傾山
邪雲邪兩奇絕衣溼松明還可爇何當聽雨鹿田
寺暗瀑吹窗燈暈結但願打鐘埽地老此山結屋
青崖坐看雲生滅

自金華至永康道中作

筍輿懸度翠嶙峋連日看山態轉新礪仄泉疑翻
白鷺雨深松欲化青人秋衾夢落前龕磬晚飯詩
題破壁塵不是平生多遠意寂寥無侶恐傷神

永康懷古四首

方技用前民利在不詭俗趙侯善越方祕怪駭羣
矚梧鼎爨屋茅張蓋坐溪綠徒嬰賢令法逸翮謝

高躅吾欲毀其祠勿奏神絃曲

事見後漢書方技傳

穹龜大如笠不隨風雨飛有人入山去徒步擔之
歸纜船夜著岸老桑灼禍機以諗諸葛恪物類感
甚微析薪使其爛同盡知誰非弘覽既靡漏保身
宜不違如何石子岡蘆葦爲單衣

事見吳均續齊諧記

天寶觀前松峨峨三千年一旦化爲石礪砢節目

堅匹如託劍解識者唯神仙賞此松石意安得凌

紫烟

事見沈汾續仙傳

雲巖高參雲巉絕無與偶奇哉壑

藏舟不可負之走舟尾如蠶垂巨釘墜誰取野僧

洗鐵花遂落孟兼手

丁張

治爲剗犀刀佩以期不朽

奈何非其人異物或爲咎神鋒忌太銛藏用古來

有

事見徐尊生懷歸臺

將返武林留別張梁友先生

十日琴堂住天涼抱病歸偶游嗤索米臨別感傳
衣社鼓聞茅店谿舂隔竹扉心期還不負久薄世
輕肥

九日同東扶游棲霞嶺諸蘭若六首

淨業菴

城中厭喧卑尋山事幽屏旁舍啓樹陰葉下秋更
靜刹那悟塵緣香寒對僧影

白蓮菴

安禪最高巔南峯俯突兀蕭條白芙蕖池荒香不
發微諦亦已忘疎磬散清樾

法螺菴

同游皆淨侶契此林下居翳翳半峯影空院生寒
初迷方未云指塵跡遂來疎

帆菴

石路轉蒙龍何處尋
梵放帆菴始知名
高閣時可望竹風起
夕陰蕭瑟難具狀

近溪菴

隔溪已延佇入門山
幽幽暗泉不聞響
窈然林壑秋何時期
支公巾舄復茲游

嬾雲窩

殘陽在檐閒空翠落
如雨道人摧貢高
留客嘗法乳向夜依
禪關唯有雲幾縷

東園

鹿眼籬邊豆葉零
機絲一半掩荒局
舊游慣識東門菜
秋露秋風十里青

宋時東門絕無民居彌望皆菜園故土人有東門菜

之諺見周必大二老堂雜志至今俗猶然也

晚秋齋居

一夜霜風撼竹門，年年秋事在丘樊。
貧憐圓菊仍分豔，靜覺涼蟄自減喧。
干世策堪黃口笑，背時詩待素心論。
中年不負蕭閑味，落葉池邊釣石溫。

試天目茶歌同蔣丈雪樵徐丈紫山作

陸鴻漸作陶偶人，茶事往往傳失真。
四十三種列高下，天目品與舒州鄰。
東西頂池湛雙鏡，奇峯秀嶸排青旻。
許邁宮連道陵宅，靈根迸石無纖塵。
含滋雲霧灌泉脈，抽芽一一留餘春。
山僧采焙趁穀雨，紙囊箬裹封題新。
肉食貴人未知重，例取武夷羅芥空。
紛綸雪樵子心似天目，山頭兩泓水獨識。
茗柯有至理，市隱近在吳山坊。
坐我三腳之木牀，空庭晝靜啼寒蜚。
爲我手瀹魚眼湯，須臾越盃發。

妙香微參鼻觀風悠颺名山秀液入肺腸恍然置

身天目頂青神鳳集樹下同相羊

李德裕平泉草木記木之奇者

天目之青神鳳集

雪樵子邀我與徐丈同作試茶之長歌

兩篇傳示句清語硬肩相摩我無筆力奈爾何天
目茶可拍天目筍可挑安得茶筍佳時一赴山靈
招勿使塵中立望空迢迢

臘月二十四日探梅孤山題壁

屈曲紅闌繞幾巡冷雲先作一分春梅花半樹倒
臨水便與逋仙寫小身

人日雪

以下壬寅

巧將薄雪破春妍便有幽禽到酒邊料峭餘寒作
人日寂寥情味逼中年梅花何處已堪折柳絮無
端早放顛惡客不來塵事絕蒙頭乞我醉時眠

耕民齋中看梅

幾樹疑在水參差簾影空苔皴微冒雪花側半吹
風閑思燈初落春懷酒正中妙香須管領況復與
君同

題亦諳上人黃山圖

憶昔觀此圖南屏倚高閣松雲蕩心魂有句不能
作冉冉七陽秋南北縛雙屨去年東阿城逢師瘞
於鶴如聞化人心積蘇故可託停車通一語游戲
除六鑿我歸師亦歸昨夢風掃籜塵纏最慙媿咫
尺跡如削入春獨掩關窗疏遲景落此圖忽寄示
逋句云當索舊觀已復還慰眼暫爲樂似證飛行
仙層層度林壑唯聞木蓮花香氣滿寥廓真幻兩
無住黃山被師攫借師畫中禪聊爾資嗚噓

清明日宗陽宮浴

昨雨今已霽朝旭開人眉不知此何日簷柳青垂
枝徐步叩藥宮消搖忘所爲道人憫塵垢俾我洒
濯之宛頸上善水道家沐浴七益一者如鳧拍漣
漪宿滯散百脈餘潤融三池起詠內景經勝食齋
房芝風篁拂苔石肅肅靈簫吹被髮游物初老子
吾其師

游龍井

惠遠住虎溪辨才住龍井坡老獨見訪送過風篁
嶺亦如虎溪邊三笑趣自永遂令龍井名遠與虎
溪併惜哉過溪亭跡滅蒼烟冷而我果斯游多年
願力猛穿村拂女桑度磴落山杏何時毗嵐風吹
墮石雲影片雲石已仆安得巨靈手重扶使之整寺門

萬竹中脩脩翳光景幽雲擁殿角諸佛同一靜僧
樸狀野鹿問事不復省導我窺井闌淺可勿用綆
傳聞金鰻鱧或見游藻荇豈其青泥蟠時出應祈
請前年秋大雨水立勢欲騁神物終斂形取足供
瓢瓊述是日僧所摩挲秦郎碑陳義臻奧境泉德類
有道片語默已領酌泉爲裴回殘陽閃鴉頸羨彼
樵牧流終身事幽屏

題金繪占江聲草堂圖

時將入都

江聲主人江上住范村西去緣江路草堂髣髴木
香村竹嶼依稀鐵爐步門前江色晴黏天屋角嵐
霏晝搖樹柳絮著水魚正肥花片入簾燕新乳主
人急裝將遠游風光似此盡少留塵中知己苦寂
寂鄒生枚叟徒沈浮爲言頻年役衣食人生識字

甯無憂有田十雙我將老息壤在彼盟諸鷗華君
秋岳墨戲今倪瓚下筆烟雲互凌亂歸來舊徑在眼
中隔浦低橋青不斷貧無送子雙玉餅展畫吟詩
反覆看他時相約力著書釣石猶堪置柔翰

城東落花

富景園中萬樹斜深紅縈草淺縈沙今年病酒無
人事纔得工夫送落花

懷徐丈紫山客金陵二首

中秋過後重陽未澄碧天光裂葉風濁酒一杯歌
一曲久無此興欠徐公

春分彈指又秋分記寫新詞篤耨熏今日秦淮歌

板絕僧樓應夢馬湘君

今年春分同紫山
賦綺羅香一闋

和蔣丈靜山九月八日登吳山

聞道城南載酒游清江如畫遠峯稠不愁紅葉明朝雨先借黃花一日秋老去情懷無檢束興來風物卽淹留登高難得鮮新句搔首真慙趙倚樓

題吳丈志上小像

我識石倉叟長身比鶴癯青衫舊名士白髮老潛夫城市看花入溪山載筆俱襄陽習鑿齒著述近來無

吳丈近葺武林舊集搜討最爲該洽

東臯晚秋

東臯土閑曠薄暮行蹤絕因思古隱者於焉衡宇

結

元末范思賢居錢唐城東地平衍有草木禽魚之樂賦詩鼓琴爲娛自號東臯隱者見徐一夔

始豐類

近市旣無求浩歌氣彌烈令我懷斯人魚鳥

轉親切脩脩林水閒遺躅猶未滅得風枯條鳴將霜遠天潔悵矣不同時誰慰授衣節

樊榭山房集卷二

樊榭山房集卷第三

錢唐 厲 鶚 太鴻

詩丙

相國寺訪亦諳上人

以下
癸卯

吾師諸行苦白足辭南屏洗盃入城市破寺風冷
冷昏旦塵一聚不見芙蓉青閉戶卽丘壑自性非
殊形許由未聞道棄瓢徒內熒耳非駐聲器無耳
甯無聽晚樹下落日龕燈冷於螢孤情出秀句勿
事重翻經

春雨夜坐

春懷憺無豫多雨境亦適平生遠游心中歲但荒
寂臥聞簷閒溜時作幽泉滴影事詎可追新愁何
用覓正復念梅花高樓一聲笛

雨中同符幼魯聖幾汎舟河渚看梅暮至
西溪

春山始可游逢雨成奇矚亂水添魚梁奔雲出幽
谷低篷何所詣蕩漾轉深曲回瞻雲峯遠前與花
林逐寒姿媚荒筠一一事膏沐因依遠人境搖動
淪漪綠客有解清琴雨深音斷續暝色入孤絃風
燈溼茅屋去舟尙躊躇花光看不足

宿永興寺德公山樓

昏黑山雨歇一徑松烟蒙微聞梅花氣吹落疎磬
中詎惜衣履溼宿處投支公凭樓答人語迴與雲
際同少選沈靄斂俯聽幽林風明星忽三五挂在
殿角東短燭照春綠夜靜山逾空觀河悟衆象拂
石期冥鴻神清了無夢亂壑流何窮焚香以達曙

茲焉悅微躬

同作

錢唐

符

曾

幼魯

空山行晚雲褐衣溼春雨昏際人漸希杳靄入
深路曲礧伏潛流叢篠紛交護到寺僧相迎把
火話曩素雨止鐘亦殘星光出幽樹境異心頓
開魂清跡偕赴夜窗覓山影影忽落如霧亂耳
百松聲鏘然奏韶濩清極本無寐有夢亦同趣
至曉重儻徊烟華想流注

永興寺二雪堂曉起看綠萼梅是馮具區
先生手種

幽人先鳥起林礧正寂然是時春空霽山翠爭便
娟的的花閒雨澹澹花上烟烟雨爲合離花態亦
變遷祭酒昔游此手種猶生前傲兀根倚石敲倒

枝暎泉微馨委陳迹高格同枯禪儒官罷亦得不
廢招隱篇攀花久延佇世已無其賢

溪上巢泉上作

翫溪遂窮源東峯屢向背朝日上我衣春泉淨可
愛不知泉落處潺潺竹籬內喧聞兩疊瀉靜見一
潭匯松風颺纖碧花影蓄深黛名言猶有相幻照
乃無悔悠然巢居心頗欲終年對

秋雪菴

菴在水中央四面皆蘆深
秋花時彌望如雪故名

夙知秋雪佳契闊三歲周今來際春初還有秋雪
不曲港迷進艇花源信回流稍深天影展四顧雲
水幽弱蘊未拆土髡柳空依洲息心歸淨域彈指
開香樓所得殊寂寂無營諒悠悠此日樂莫樂觀
生侶輕儻

柏家園行三四里皆竹樹梅花中

遵塗抱町畦緣林窺嵒嶽古屋氣始暄閑園地常
潔梅竹素所饒衣食理未缺旣得長子孫還以資
妍悅叢叢綠雲外斜陽照花雪烟影望自深風香
渺難說行吟覲歸禽安居務新節暫游如久棲悵
與清景別

晚入石人塢還永興寺

撥蘿尋微徑山意黯將暮幽討忘體疲窈窕入深
塢激瀨不通人踏石凡屢渡返景忽難留蒼蒼目
爭赴萬竹皆爲風千花并成霧去鳥有遺音歸樵
詎同趣夕梵懷信宿春溪延緩步入門不生月仍
倚簷際樹

春日汎舟北郭

出郭逢初霽蓬窗任意凭氣新如有獲興到亦無
朋遠水浮春寺青山落晚簷爲憐桃李色歸待月
東升

春寒

漫脫春衣浣酒紅江南三月最多風梨花雪後酴
醾雪人在重簾淺夢中

綠陰

幽人與時鳥共喜綠陰成一徑千林暗斜陽片雨
晴臨池想康樂繞屋咏淵明卽此忘春去悠然悟
達生

雨後坐孤山

林巒幽處好亭臺上下天光雨洗開小艇淨分山
影去生衣涼約樹聲來能耽清景須知足若逐浮

名媿不才誰見石闌頻徙倚斜陽滿地照青苔

夏日閑居

畏景何堪出風前臥簟斜樹陰連別徑草色入隣
家舊業閑來廢禪心病後賒今年飢似朔不擬上
公車

湖心亭大風快涼得絕句二首

西北雲多失柳陰快風特地埽煩襟不成飛雨闌
干外涼殺沙邊兩睡禽

湖上青山深幾重紛然幽綠舞長松何人爲喚昭
華手橫笛吹驚水底龍

清平山精舍納涼

崖上緣修竹城南界小天幾人來亦偶六月興尤
偏江遠平看鳥窗虛俯聽蟬清風惜不得借與客

堂眠

七月六日立秋送陳授衣之廣陵

作客畏逢秋君今詎不愁五湖飛一葉七夕在孤
舟殘暑過江少涼螢逐暝流歐公堂外柳爲訊舊
同游

金以甯齋中觀蘇漢臣埽象圖

西域乘象利戰攻南越貢象趨華風趙家山河已
幅裂欲圖王會誰能同當年明禪教車象象院驅
來列成兩

吳自牧夢梁錄明禪年教習車象後大象二頭觀者如堵

開封蘇

郎設色殊寫出突過閭令上貝多樹底風泠泠蠻
奴馭象唯使令黏香似是孔雀帚瀉水但用頻伽
餅高僧侍者狀奇詭作禮蕃王喻微旨蹴踏能將
大力馴埽除不使纖塵累西域之象南越無六牙

四足蓮花敷畫院良工具深意調服強敵如斯夫
君家此圖傳自昔仍在錢唐睹奇跡裁詩復共小
低頭香斷空齋山月白

中秋對月懷都下故人

玉宇無窮望眼寬不辭清露溼杯盤秋來南國宜
高臥月傍東城得早看豆葉響回三徑靜桂花風
入二毛寒誰招遮日長安手直到天明共倚闌

秋夜聽潮歌寄吳尺鳧

城東夜月懸羣木洶洶濤聲欲崩屋披衣起坐心
茫然秋來此聲年復年壯心一和小海唱二毛不
覺盈吾顙胷中雲夢吞八九要挽天河斟北斗倏
忽晴空風雨來杳冥水府神靈走時哉會見滄溟
立自是乾坤有呼吸軒轅張樂萬耳聾洞庭天遠

魚龍泣須臾聲從靜裏消一蜚獨語星蕭蕭天明
作歌寄吳子想子中宵亦聽潮

張東扶移居瑞石山麓

昔君買宅時城西數相見藥闌碧透池書窗淨于
練意復厭喧卑擇隣猶未善栗果多博徒出入須
障面愛此城南山翠逐深巷轉張南與周北戶戶
事筆硯高楓紅一林奇石青數片留雲罷香爐賓
月橫琴薦語我色忻忻邀我意眷眷我賃東臯居
有若營壘燕差得水三分無山讓君先里鮮可語
人閉門俗自遣過存近亦稀頗不費茶串連牆恨
未能來往共歲晏

初寒著敝羊裘戲作

一領彤茸歷十霜西風重見出空箱忍寒貰酒無

多直穿袖吟詩定幾章
敗絮何慙擁王霸險衣今
笑裏周郎漸看不隱山
肩瘦萬丈虛言蓋洛陽

冬日同東扶游鳳凰山

故宮何足問佛宇亦摧殘
本以塵緣幻來將道眼看
江山迎小雪竹樹逼清寒
雙雀尋苔啄飛飛下井闌

楊貞女詩

楊氏有貞女窈窕年初笄
英英司馬孫喬木無卑枝
明心兼秀質說禮復敦詩
行媒得快壻許嫁亦不遲
何郎薊門死女聞涕漣
而上堂告父母聽女前
致詞女幼習詩禮大義或
少窺古稱未亡人鮮有不
結褵若女而不婦佗適無
相訾此語衆苟同女心難
自欺許身等珪璧親命詎
易移匹如壻貧

落夙諾無參差貧且不可背死乃忍背之女心抱
微尚奚取鄉國知當歸何郎家再拜從此辭父母
聞之泣咄咄事大奇汝有松柏心吾亦不汝乖桂
楫青絲紉相送於河麋吳閶三百里雲水天一涯
本意曲顧歸竟爲同穴期入門拜尊章毀容披素
帷身是女貞木淚作寡女絲死當化王睢生當號
長離

雨後寫望

風敲病葉入疎櫺雲破寒山數筆青十日鼓琴晴
始出夕陽依舊滿迴汀

贈韓丈自爲

金粟風流久絕羣弁陽今復見夫君梨花萬樹營
生壙自說他時葬白雲

嚴朗屋寫小像爲杜子春事索題四首

長安游戲倦風埃
論到錢愚劇可哀
脫手紫標三百萬
杜郎俠骨本仙才

雲臺峯頂約驂鸞
杞犬芝童覓最難
上界曾聞足官府
囊空不贖一錢看

丹砂成土髮成絲
月下空封六一泥
畢竟求仙因藥誤
被紈飲酒是男兒

君如夷甫不言錢
卻采虞初入簡編
歸去但尋梅尉女
挑燈細話小游仙

閑居和丁敬身

徑有青蕪石有衣
不嫌蕭瑟與心違
隣燈明處先穿樹
山雨來時自打扉
營室差能學劉峻
養痾多爲擬王微
災年杞菊收猶薄
且辨蒲莧晨興小忍

飢

寄徐丈紫山嶺南

此別驚垂老初鴻有信傳
勤收駐顏藥儉用賣文
錢鄉夢過梅嶺吟情寄竹田
歸裝定何日目極浙

江船

漢書南越處篁竹之中師古注篁竹田也

雨夜聞雁

燈花不向雨中開
擁被愁聞雁叫哀
深黑雲天箏柱落
昏黃庭院檣聲來
誰家關塞書難寄
到處江湖羽易摧
甚欲孤篷南浦宿
殘蘆滴響夢驚回

哭王源村丁茜園二首

平生師友十年閒
雪月花時記往還
原季長貧成白首
應劉俱逝託青山
篋多遺藁從人取
室少孤兒信命慳
北郭西橋同此恨
笛中先後淚潺湲

賈生賦裏嘆浮休，欲再爲歡挽不留。
練日人閒誰會葬，傷春地下必相酬。
谷音寂寂雲無色，神理緜緜水自流。
兩地明年作寒食，棠梨零落一般愁。

金壽門過訪以詩卷索拙序茶話良久殊
慰寒寂

爾我相看已壯夫，恆河照影昔游徂。
江山興好朋尊隔，羅綺年來一字無。
折腳鐺邊殘葉冷，缺脣餅裏瘦梅孤。
只應絕調艱爲序，卷卷淹留類賈胡。

餅菊和丁敬身

翦供寒花霜露餘，琴牀筆格暎森疎。
徑松荒後爲餅隱，山杞持歸伴水居。
影畫銘心燈耿耿，夢香養鼻蝶遽遽。
幽人服食宜清苦，留得風標一起予。

懷亦諳上人游鄧尉

城中數覓不相遇阿師始是心出家寫經坐沈木
瀆雨負杖吟過銅坑花天寒正覺五湖遠歲去那
用雙手遮窗前舊竹亦可念一兩三莖曲復斜
東扶送水仙花五本時臘月七日雨中
春思於花亦太廉一花一葉一愁添肉人不合尋
常見燈影娟娟雨半簾

題沈欒城歌詩圖

戍削春衫瘦更妍故持樂句近君前玉溪比日風
情減難擬清歌沈下賢

汪青渠營土橋精舍去予居二里許雪中
過之不值題壁二首

近得林中侶堪爲雪裏行玉川雙破屋東郭兩先
生積素微封徑寒雲半入城白鷗吾與汝一笑眼

俱明

竟日空亭坐遲君開板扉幽禽啄凍雪風竹發清
機孤趣忽自悅遠言相與違昔人翻興盡容易剡
中歸

寒夜同沈欒城杭大宗集趙功千二林吟
屋分詠歲除節物二首

膠牙錫

節物關人意殘年一櫟添蓼花分點綴粉繭共繚
黏俗嗜難頤解微甘使口箝不妨吾舌在蜜味得
相兼

陸放翁詩新潔
錫枝綴蓼花

糝盆

糝盆宋時亦呼生盆
見劉昌詩蘆浦筆記

屈指開爐後生盆卽漸催紅飛松葉火白壓豆蔞
灰列屋明通夕深廳聒一回兒童應未覺扶暖上

簷梅

同欒城耕民游艮山山在城東北高可二丈許蓋土阜也旁列古松三四晚風肅然殘雪在地臥殘碑已中斷讀之不甚了乃元艮山土神廟碑大德己亥紹興路儒學錄古杭沈德章記并書廟不知毀於何時作詩紀之

臯亭雪未消數峯粲可數城陰艮其背有此山戴土牽拂無事朋共探風物古晚寒閉漁村斜陽入蔬圃疎松時一響似喜我輩撫徘徊去仍留斷碑記祠宇惟存豬兒年髣髴辨某甫斯人今安在閱世如過羽社翁一尊酒寂寞罷歌舞明年梨花時再尋比韋杜沙河春水生看客曳柔櫺

歲除日同王雪子吳耕民放舟湖上入南

山作

路入南屏葑草荒
冷雲閑鷺兩相將
岸痕倒樹生新水
塔影留人戀夕陽
春八九分來鼎鼎
年三十
二去堂堂青山似
欲償詩債著意湖
邊列雁行

天詩何況纔中年又過三十二

春來

甲辰以下

忽忽燈期過
春來只惘然
花開貧酒戶
草長舊情田
小檻拋書坐
幽窗背月眠
無人知此意
語鳥漫相憐

題盛嘯厓樵秋圖

秋碧有聲霜紅有色
山寒不欺徑仄不惑
一來而耕一船而漁
行吟負薪孰云非夫
如困之石亦介

其守予肩則賴予顏則否籬延于菊門隱于莎曷
歸乎來勞者遂歌

溪上巢懷去年與幼魯同游

山行有常期卽事感今昨春候雜暄淒人心異所
託獨爲泉上吟坐聽鳥聲落鏡我塵土顏竹木影
參錯我友支許流往者共斯樂去矣渺川原懷哉
悵猿鶴幾人京華游能不廢丘壑擬宿贊公房夢
尋煮茶約

石佛菴贈敏上人

釋子吾宗秀新詩似白雲開門一花落繞屋百泉
分定老烟蘿色悲同魚鳥羣塵中漫回首清話幾
時聞

元詩僧白雲英上人
唐侍御元之後也

沈大匡先生華山草堂

心跡竟沈淪空山閱古春亭留唐野史名在宋逋
臣破壁全題字雙松一作薪惟應千載上媿殺瘦
腰人

西溪梅花已殘永興寺綠萼二株正盛開
春風十日怒於虎香雪紛紛落成土我來恨與花
愆期嬾逐閑雲入花塢一笑逢此萼綠華冷寺空
庭相媚嫵林端初日開煙霏皜曜鮮妍世希睹花
雖無言酬以意爲待幽人來作主幽人與世實寡
營捷足纖兒每工侮目成色授不嫌遲卻月臨風
更須譜空香入磬韻微茫枝格橫苔影交午爲花
不惜三日留隔竹一聲啼翠羽

二月十七日重游洞霄宮探大滌洞天

振衣浴罷體更輕竹杖投石聲彭觥空山昨夜龍

洗窟雨過萬壑泉縱橫山靈知我有默禱故遣松
風作前導一峯陰見一峯晴天柱中央翠於埽元
同先生昔隱居洞天長鎖琅函書前游日夕未曾
到恨身不得乘飈車穿盡幽篁履苔石驚見谿
洞門坼童子曾爲擣藥禽桃花解笑題詩客此中
日月停兩丸想像九夏尤清寒微明秉炬觸暗壁
古靈題字來尋看洞中題刻多漫滅但見一玲瓏處云陳襄述古來癸巳夏玲瓏
乳竇隔凡處路接華陽不歸去有人問我洞中來
爲說浮雲如柳絮

功千見示劉松年溪山樓閣圖用坡公集

中韻

淳熙小字藏石邊絹素微裂凝塵烟暗門劉郎呼
欲出鶴歸城郭應悽然劉郎自具擘山手斷續飛

下雲中泉重樓面勢各向背地非輞口非樊川蔽
虧綠樹露小閣水紋山影闌干前消搖白日不待
遣倚枰二客全其天尋詩一老獨有意目送去鳥
窮幽妍尤工遠勢寫村落背崦或有桑麻田丹青
不讓李晞古金碧直壓趙大年畫史筆力在盤礴
無取小景爭便娟關門聽雨品字坐焚香埽地曲
尺眠落花將春作昨夢主人與客俱列仙只愁青
壁太斗絕畫裏欲學猿猱緣莫言此畫非我有他
日想見哦長篇

同張東扶石貞石游雲居寺禮中峯和尚
髮塔

幽磴無人行露蘚綠相待倚山爲女牆春物見爽
塏叢深鳥嚶嚶沙崩石磊磊長廊據寺勝酌泉散

憂毒恭聞大導師岳畔藏落彩

唐淨業法師塔銘
高宗忌辰方階落

彩

作禮向閑房真風故常在選樹坐移陰仰看雲
意改游雲忽東南遐心渺江海

同作

上虞

石

文

貞石

春雨回荒姿餘寒晴復陰逶迤步石徑禪室來
幽尋衆山已秀發綠淺未滿林繞寺雉堞壯入
門臺殿森阿師久西去遺履猶至今妙相渺難
睹默契情更深合十向雲際恍聞淨土吟四體
豈無愛諸妄惟滅心緬彼紺螺色香土歲月沈
但餘烟草碧如絲緣塔侵平生慕禪意苦爲飢
火燖焉知此僻境修廊靜悄悄閑閑湖上景悠
悠南山岑鉏聲徧芳野微風忽鐘音暫憩殊有
會虛寂歸沖襟

題沈啓南冷泉亭圖次韻

石潤林香下夕暉風中似有磬聲微好山招隱貧
難買妙畫通靈久亦飛題字尙留前輩在聽泉今
見解人稀頻年不踏松陰路臥以游之恰忘歸圖向
爲靈隱僧房物後歸龔田居侍御今歸趙君功千
上有吾杭劉邦彥吳江汝其通并啓南自題詩

同作

錢唐

沈嘉轍

樂城

爲看詩畫攬清暉遐想當年結思微古木千章
陰乍合寒泉一道雪橫飛風流已往誰能續墨
瀋猶香知者稀曾憶晚來成醉後一亭烟靄見
僧歸

又

錢唐

吳

焯

尺覺

晨坐高齋竟落暉祇因讀畫悟幽微聽來畢靜
水生響看到出神峯欲飛往事重題增感慨舊

游如夢記依稀回思羣屐經行處空惱耕烟閣

筆歸

田居侍御曾屬
王石谷臨摹

同沈欒城吳尺鳧趙功千登六和塔

江行安微風回泊龍山下羣峯勢蜿蜒茲塔獨凌
跨何年劫燒餘突兀八窗赭同游三數人綠陰愛
僧夏層梯入大幽初級見頗寡攬身盤空雲江色
向我瀉三折之字流隨山動平野東矚窮剡源西
眺思汐社帆檣閱興衰魚鳥被風雅萬古一斜陽
欲玩不堪把塔中有金仙詎是無情者

洗心亭看竹

遮簷萬玉翠森森迴合空潭倒影深若似此君何
用洗多生無垢亦無心

宿雲棲寺

入林人語忽尋烟來共堂頭此夜禪本色住山深
有味清詩呈佛豈無緣竹龍行水風回後栗鼠窺
星月出前不待諸天訶放逸心清坐聽曉鐘傳本色
住山見惠洪林閒錄貫
休詩云得句先呈佛

次韻答石貞石雨中見懷

便作神仙亦號頑日長無客共蕭閑鬱洲家似邴
根矩退谷銘如元次山水鳥求魚衝葦外幽花緣
竹出牆閒城東若役高人夢帶雨籬門未上關來詩
有夢落城東
水竹閒之句

梅雨經旬得遣懷絕句六首

小樓高處看雲奔銀竹千條挂晝昏不道去年池
水竭碎萍猶未浸籬根

欲出并無下澤車此生難得是三餘
夢絲不斷簷

前瀑如在匡山讀故書

龍公一剏破慳多卽漸空原展綠波十角吳牛三尺箠棟花點點響烟蓑

久將脣舌薄君卿深掩柴荆罷送迎穉竹高槐皆雨立忽然放出夕陽明

舊種垂楊綠埽磯北風將雨上漁扉前村半入空濛裏雲帶炊烟溼不飛

手疎名士離騷酒眼避高僧競渡船一笑茅堂作重午自鉏昌本煮清泉

立秋日同馬丈碧滄汪青渠松泉上人游惠山舟中口占

綠楊深似雨港曲覆移舟停扇聽僧語西神山正秋

惠山聽松菴觀王孟端竹爐詩畫卷次吳

文定公韻

舍人雅尚寄名泉爲愛山僧手自煎
鉶響風中兼雨外水評陸後更張前
空寮只許茶人住一榻翻同竹祖眠
三百年來留寶墨簫材無恙是天然

廣陵秋夜聞絡緯

清月出三更重露零百卉空堂風騷騷
臥聽蟲恤緯不能成我衣爾蟲焉足貴

題余葭白青燈雪屋圖

賤子客廣陵塵土感騷屑白帝初執矩
赤燦未弭節何方解炎歊噓以庾郎雪
移我墮寒林短紙開凹凸銷餘復待伴
入夜氣嚴潔琤然落風枝夢醒覺衾鐵
燈光與雪光爭此破窗穴直身凜自持
孤

吟慘不輟琴絃爲一心雖凍詎肯折起視江外山
玉立正清絕寤言期斯人歲晚祛內熱

公路浦卽目

傲傲水柳細成行荷葉無花亦自香行過江淮惡
風浪幽情忽到小池塘

桃源縣雨泊寄舍弟子山

帶雨河聲大維舟暮色虛蟲喧堤外草燭暝枕邊
書瘦第入魂夢衰親問起居天明仍捩柁遠道信
來疎

嶧縣道中

蒼翠連鳬嶧秋原望更深僕夫通馬語行客抱山
心沙雨纔霑路涼蟾忽到襟豆花門巷小何處似
家林

宿鄒縣謁孟子廟畢看嶧山夜月

廟貌掘衣拜機絲儼若新月來邾子國人宿孟家
隣翠嶧森侵漢殘碑遠失秦松風吹夜氣壁立四
無塵

廟有斷機堂

富莊驛遇潦

野水秋無次能爲塗轍妨棗林明四望黍壠白中
央馬足行雲影車輪陷鏡光空村烟火絕竟日苦
飢腸

任丘道中寄汪袞江

雨挾雲陰天四垂孤城縈策況淒其綠楊風起狐
狸淀細草烟荒扁鵲祠劒客於今誰慷慨馬羣自
昔重權奇燕南趙北明朝是秋水茫茫有所思

趙北口

齧盡長隄碧玉平
喚船人集午相爭
偶然束馬懸車渡
亦似浮家汎宅行
魚柵低圍蘆作界
酒帘斜挂柳爲城
眼前便減風埃色
何用臨流更濯纓

都下寓舍偶作

卽次便幽窄
窗深雪紙明
棘牆愁露索
塵市畏風行
自攝安眠食
無求少送迎
瓦餅鈿菊小
伴我一枝清

入洛誰相問
深居等繫匏
唐碑從寺勘
秦譯借僧抄
風雨新圓夢
雲山廣絕交
時時期二妙
攜手看

烟郊

謂金繪甫
符幼魯

風氏園古松相傳金源時物近爲人所伐
幼魯有詩惜之邀余同作

昔游長安歲辛丑
城南欲謁支離叟
雪雲連日成

春陰人事逡巡願終負鵠袍烏帽感秋氣首問支
離無恙否故人三歎爲我言長身摧折名不朽偃
蓋爭看前輩句清陰屢入游人酒不隨風雨飛夜
半蒼鱗剝落根如白我聞名與身孰親此理天壤
誰爲剖藤纏敲壑雲霧障長得千年養靈壽輪蹄
人海叟何心占此區區地盈畝豈無匠石議斧斤
竟使樵蘇疑怪醜榆承露盤不自畏楮錄醫經最
顏厚但讀南華齊物篇世間變化無不有

寄內

炎風記上郭門船回首高城更黯然徐淑初還因
善病龐公欲隱坐無田夢回竹月攤書地人道風
潮損稼天行卷賃居成左計心關桂玉路三千

南歸夜行趙北口同范希聲作

歸人千里指故鄉三更霜霧霑衣裳有如小兒臥
車箱搖則成夢醒已忘寒星在水森有芒仰視畢
昴紛低昂遠烟蒙密隄影長西風策策吹枯楊參
差人語知異方作事五角與六張我識此趣如瀟
湘菰蒲明滅燈火光驚起棲雁飛一行胡不飛去
江湖旁

九月晦日曉行阜城道中大風雨午閒飛
雪宿漫河作

野曠雲亂生天黑月正死登車偃破帽寒門開萬
里風從何方來洶洶鳴不已大聲東海濤小聲空
林鬼浩蕩達士曾自詫無此耳中閒零雨集覓路
復迷咫尺柅車候天曙兀兀行泥水天公善娛客吹
作玉花委飢雀喧茅檐勸我可以止溼薪燎故衣

冰齋鏗老齒江南孟冬天妍暖梅弄藥誰遣北地
游北地寒至此

東阿逆旅壁有無名氏絕句云霜樹微茫
月半環解鞍茅店且偷閑行人過盡嚴更
發一盞寒燈滿屋山次韻一首

斷岫層巒似玦環客亭挂策夕陽閑重來柳髮疎
於我滿眼寒雲話故山

過東平懷蘇源明五太守讌集之詩城外
山際積水空明疑是小洞庭也卽效其體
夕稅駕兮宿東阿思東注兮若流波朝秣馬兮望
東平霜空晶兮初日生澹平林兮遠如一寒漲落
兮洲激出巡中湖兮眇而南山蠡蠡兮形眠蠶輕
橈去兮思夫君大藩理兮讌以文嗟繭絲兮人或

擾懷風流兮散雲鳥命元氣兮爲余舟野荒忽兮
期同游

元氣爲舟
仲長統語

徐州舟行紀事

檣爲舟中權帆勢若懸纛有時牽挽勞竹索相綴
屬我舟順流下彼舟適遭束紲急不可弛磨戛鳴
數數兩舟掣而離其勢不轉矚篙師失聲呼疾似
振空鵠高檣忽中折觀者膚盡粟我舟播蕩餘幸
免鬼伯促性命亦匪輕造化戲何酷有如爭拔河
一跌聊自贖又如放風鳶線斷偶然續神意憐迂
疎字飽飯不足書寄破冢出事過虛船觸是時冬
上旬冷月光於燭漕河下牕牢函水嚴監督三暮
復三朝何時峽離蜀悵脰望南雲臨深古所勗

倦游今亦厭飛揚始葺城隅破草堂檢校豳詩小
經濟蹉跎寒事舊林塘晴天免縮參軍首雨夜休
移杜老牀更乞山僧安隱法淨名圖畔自燒香

開湖寄徐丈紫山義興

君昔閉門湖上初葺雲萬丈復開疏誰其云者兩
黃鵠我欲遺之雙鯉魚明鏡拭平西子面翠綃展
盡水仙居待回罨畫溪邊櫂酒舫隨風縱所如

雪後同耕民汎舟北郭游一僧舍頗盡幽趣

臘尾能爲寂寞游恰經野渡有漁舟過橋溪水斜
風急帶雪僧房落日幽世外話銷商陸火林中春
在木棉裘平臯鶴叟今何處吟望寒山共點頭

張元

仲舉在杭日有一私印文曰平臯鶴叟蓋取北
郭三山名臨平臯亭黃鵠也見朱珪名蹟錄

春雪密香齋擁爐同少穆耕民作

春寒春雪劇相仍小坐林巒白幾層冷淡交情宜
歲晚清嚴況味在晨興同依品字柴頭火老作梅
花樹下僧門巷泥深君莫去紙窗猶有照書燈

樊榭山房集卷三

YORK UNIVERSITY

MAY 15 2001

EAST ASIAN STUDIES

62077481

廣州市古籍書局
舊書門市部

定價	2.50	冊數
		8